

15

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

T5236.47/3223

續文選卷第二十八

箴

皇太子箴

王爽

臣聞文以文宣，武以武成。不足收

皇明之功，功以道成。又為

居居之明，明由德彰。其人

之對，對以道成。其人

之對，對以道成。其人

續文選卷第二十八

明平原湯紹祖公孟撰

箴

皇太子箴 并序

王褒

臣聞教化爰始詠歌不足政俗既移風雅斯變伏惟
皇明御寓功均造物改文為質斲雕成素皇太子游
雷居震明兩作離春夏干戈秋冬羽籥叔譽慙五稱
之對師曠降四馬之恩竊以太史官箴虞書所誠永
樹芳烈丞相所以垂文深睹安危太傅以之陳訓敢

塔佛大學漢和
圖書館珍藏印



因斯義獻箴云爾

天生蒸民司牧斯樹咸熙庶績式昭王度粵若欽明
丕承寶祚重紐地維再匡天步惠民垂統元良繼體
麗正離暉惟機天啓令問令望聞詩聞禮從曰撫軍
守曰監國秋坊通夢春宮養德桓榮獻書荀攸觀則
元子爲士齒卿命秩昔在周漢親賢保弼朝服寢門
廻車作室正陽君位喬枝父道臣子所崇忠孝爲寶
勿謂居尊禍福無門勿恃親賢王道無偏無爲慮始
無爲事先損之又損而全之亦全無往不復無平不
陂美疢甘言鮮不爲累則哲爲難知人未易居室爲

善分陰無棄亾保其存危安其位神聽不惑天嫉斯
忌文昌著於前星秬鬯由於守噐庶僚司箴敢告閤
寺

后史箴

袁表

穆穆中壺王化攸基正位於內易贊坤儀二妃助舜
三母興姬於惟國風肇始關雎內德之茂曰儉與勤
明章婦順以佐一人旣肅且雝逮下敷仁繁藻攸潔
蠶桑是親昔在夏禹塗山協德殷湯齊聖有莘率職
班姬進規履正不忒淑慎無愆嬪御是式載稽哲王

務修陰教習禮稱詩阿保是詔無怠無荒以正家道
萬國承流是則是倣樊衛宣譽馬鄧稱賢舍貞履順
敬以勉旃無成有終聖訓昭然戒於滿盈百福乃全
皇明基命 九聖重光徽音內嗣媲美宣姜載詠多
男王猷允康敢告彤史旦夕無忘

銘

大愛敬寺刹下銘 并序

梁簡文帝

夫波若真空導大生於假域涅槃有岸引未度於無
邊應此十千現茲權實隨方攝受孰能弘濟皇帝照

盡神原心疑寂境深慈降跡下答蜺蜃握鏡斷鼈經
綸世阻故能天地貞觀日月重光業曠四弘功侔十
力惠雲旦聚浸澤灑於遐外法炬夜明揚光燭於梵
頂因心孝愛道契神明昭事誠享曰隆哀敬金車答
瑞追德慶於虞年甘露登祀比嘉祥於漢日旣而理
局舜圖事終典思所以功超域外道邁寰中廣樹大
緣增隆勝善事等淨名齊方便於圓極跡均妙掌襲
兩寶於冥因乃於鍾山竹澗奉爲皇考太祖文皇帝
造大愛敬寺焉惟茲神岳勢負龍形均太華之四成
狀彭門之雙起曲澗推移激水精之浪清風窈蕩散

雲母之行顯帶皇邑標地德之慶雲彌望帝纏矚神
居之敞麗昔鴈泉之願真如所隲鷲形之岳大聖攸
居創此伽藍同符往跡以普通三年歲次壬寅二月
癸亥朔八月庚午建七層靈塔百旬既聳千龕乃設
漸山啓基踰於禁窳國土金刹長表邁於意樂世界
珠幡轉曜寶鈴韻響聞聲者入道見形者除累仙衣
梵帶去鴈塔而來遊天香風笙辭鶴城而下集靈祇
叶贊有識歸依四將五龍翹勤翌衛八臂三日頂帶
護持雖復劫盡恒沙衣消巨石儼如常住妙相長存
作銘曰

朕哉睿聖至矣炎精功昭鳳紀德契雲名冥符七覺
爰極四生儀形懋典道駿有聲皇心閔睇理篤天誠
八萬神構二四雲弁懸梁浮柱沓起飛楹日輪下蓋
承露上擎玉函蘊色珠髮韜明花窟炎聚石影光輕
天下欽仰幽願贊成法舟斯濟惠海方清淨界無毀
金地永貞

東宮玉帳山銘

庾肩吾

玉帳寥廓崑山抵鵲總葉成帷連枝起幕玉葉難移
金花不落隱士彈琴仙人看博巖留舊鼎竈聚新荆

續文選 卷二十八
煮石初爛燒丹欲成桑田屢變海水頻傾長聞鳳曲
永聽簫聲

太極殿銘

并序

徐陵

夫紫蓋黃旗揚都之王氣長久虎踞龍蹯金陵之地
體貞固天居爽塏大復尊嚴高應瑞門仰模營室歸
於有德譬彼河圖傳我休明義同商鼎太極殿者法
氏象元王者之位以尊左平右城天子之堂爲貴往
朝煨燼多歷年所世道隆平宜其休復監軍鄒子度
啓稱卽日忽有一大梓柱從流來泊在後渚岸嗟峨

容與若漢水之仙槎搖漾波濤似新亭之龍刹孤拔
靈山允彰天貺昔梁武承聖將圖繕修東虜窺江西
胡犯蹕定之方中亟興師旅揆之以日輒有災故是
知秦人所止實漢祖而爲宮吳都佳氣乃元皇而斯
宅千櫨赫奕萬栱峻嶒植綠芰而動微風舒丹蓮而
制流火甘泉遠望覩正殿之崢嶸函谷遙看美皇居
之佳麗信可以齊三光而示宇宙會萬國而朝諸侯
爰命微臣乃爲銘曰

雍時相望參差未央偃師還望崔嵬德陽高捫太乙
正觀瑤光峨峨靈柱赫赫流樟美矣官室嘉哉今日

御展垂旒當朝靖蹕樂備韶夏禮兼文質帝旅無諠
王旗斯謐肅肅卿士邕邕丞弼漢座雕屏周人檻櫺
城隅有勒殿省皆銘况復皇寢宜昭國經方流典訓
永樹天庭

後堂望美人山銘

徐陵

高唐礙雨洛浦無舟何處相望山邊一樓峰因五婦
石是三侯嶮踰地肺危陵天柱禁苑斜通春人恒聚
樹裏聞歌枝中見舞恰對粧臺諸牕併開遙看已識
試喚便迴豈同織女非秋不來

永陽王齋後山亭銘

江總

叢臺造日淄館連雲錦墻列績繡地成文吾王卓爾
逸趣不羣梅梁蕙閣桂棟蘭枌竹深葢雨石暗迎曛
激流疑疏構峰似削苔滑危磴藤攀聳嶸樹影搖牕
池光動幕月澄遙淑風清近壑雪岸難銷花園易落
高桐百尺垂楊五株開榮九畹結秀三珠山條紫的
水葉紅鬚抽芳繞雷接翠分衢亭謹旅鶴浦噪驚鳧
前列枚馬後招申白諷誦楚詩精微沛易叢桂畱賞
散金匪惜不羨睢陽還嗤碣石馳聲終古服義無斁

玄圃石室銘

江揔

仙巖石楡仙宇石牆地云正域道示脩羊紫煙碧露
絳雪玄霜廣成不踐王烈未翔移華甲觀徒構震方
遠跨飛梁俛臨倒景瓊蕊珠樹金堦玉井映日分暉
搖風共影岫濃翠合林虛桂靜朔去偷桃董來貨杏
檐非刻削戶恣登臨迎春花近避暑涼深秋雲卷闔
冬霰停陰桐棲鳳采竹化龍吟輕飛亂色激溜成音
天縱儲睿生知作兩弦誦餘隙仁智爲賞河曲停遊
洛濱息往祥梨吐秀瑞燕流響一物或鑄萬國斯仰

秦州天水郡麥積崖佛龕銘

并序

庾信

麥積崖者乃隴底之名山河西之靈岳高峰尋雲深
谷無量方之鷲鳥迹遁三禪譬彼鶴鳴虛飛六甲鳥
道乍窮羊腸或斷雲如鵬翼忽已垂天樹若桂華翻
能拂日是以飛錫遙來英杯遠至疏山鑿洞鬱爲淨
土拜燈王於石室乃假馭風禮花首於山龕方資控
鶴大都督李允信者籍以宿植深悟法門乃於壁之
南崖梯雲鑿道奉爲亾父造七佛龕似刻浮檀如攻
水玉從容滿月照曜青蓮影現須彌香聞切利如斯

續文選 卷二十八
塵野還開說法之堂猶彼香山更對安居之佛昔者
如來追福有報恩之經菩薩去家有思親之供敢緣
斯義乃作銘曰

鎮地鬱盤基乾峻極石關十上銅梁九息百仞崖橫
千尋松直陰兔假道陽烏迴豈載輦疏山穿龕架嶺
糾紛星漢迴旋光景壁累經文龕重佛影彫輪月殿
刻鏡花堂橫鐫石壁闔鑿山梁雷乘法鼓樹積天香
漱泉珉谷吹塵石床集靈真館藏仙冊府芝洞秋房
檀林春乳水谷銀沙山樓石柱異嶺共雲同峰別雨
冀城餘俗河西舊風水聲幽咽山勢崆峒法雲常住

慧日無窮方域芥盡不變天宮

終南山義谷銘 并序

庾信

周保定二年歲次壬午七月己巳朔大冢宰晉國公
命鑿石關之谷下南山之材維公匡濟彝倫弘敷庶
績燮理餘暇披閱山經以爲終南敦物日月虧蔽
榦栝栢綺桐梓漆年代蘊積於何不有乃謀山澤之
官兼引衡虞之匠東出藍田則控灞乘漣西連子午
則據涇浮渭派別八溪流分九谷銅梁四柱石關雙
啓青綺春門溝渠交映綠槐秋市舟楫相通蓄之則

爲屯雲泄之則爲行雨青牛文梓白鶴貞松運以冥
宮崇斯雲屋千櫺抗殿龍首千雲萬頃疎苗蟬鳴再
熟川后讓德山靈景從豈如運石甘泉纔通櫟陽之
殿穿渠穀水直繞金墉之城將事未勞爲功實重國
富人殷方傳千載因功立事敢勒山阿銘曰
寥廓上浮崢嶸下鎮直立千丈峰橫萬仞桂月危懸
風泉虛韻乘輿嶺阪舉鍾雲根八溪分注九谷通源
北涵桐井南浮石門模象大狀規繩百堵交葛九成
徘徊千柱桂棟凌波栢梁乘雨疏川剪谷落實摧柯
事均刊木功侔鑿河

甌龍潛誼定三吳席卷七閩波靜平蜀師還功存不
競始冠徹侯終膺九命陰諧帝志釋兵休請幾失彭
英恩隄賈鄧矯矯宋公玉立而武克紹哲兄牙爪心
腑宣力中原揚威大鹵儋珪上公啓茅殷士丈人之
吉以忝征虜天愛西南乃生穎國惟穎之雄開平是
則喑鳴震盪兆衆辟易劔閣中夷昆池永闢碧鷄再
鳴白雉重譯豈不崇封帝省其籍於爍黔寧戚均皇
胄豪鷲神啓機權中秀玉關師出葱嶺衡仆移兵佐
穎樹績畱後六詔稱一百蠻歸奏篳路騶編熊莊何
陋世裔開府若若兩綬武莊長身頰色立鐵橫槊雄

呼濤偃山裂作鎮婺邦襟控全浙峻猷垂念狂刃中
發兆應神光靈昭殄滅鄖公宏略飛舠大江首定集
慶如漢關中戰深陷敵矢義就終遙封未享馳澤難
弟鄱陽師軋日月虧蔽陸舟橫擣百戰彌厲迴旌西
指岷蜀崩潰帝訓昭回垂耀千祀巢湖之艦威均六
師猗歟號公沈算先幾委力劬瘁伏節驅馳南安越
雋寔克繼之蟬纒金曜戟垣差池簡簡泗公果毅能
整入贊樞衡出奠越嶺匪昧衣袵需泥在頃適篤象
賢孤誠愈秉疏勒長興敵憐曷逞爲况爲弁丹青彪
炳彭湖鏖勁嶽坼天吡列宿徘徊神龍泥淖兩賢旣

三韓肅清龔行天罰赫赫明明文德上暢靈武外薄
車徒不擾苛慝靡作凱歌載路成功允鑠反旆還軒
遵林壑壑停輿海溼駐蹕巖趾宵想遐凝藐屬千里
金臺銀闕雲浮岳峙有感斯應靈禽効祉飛來清漢
俱集華泉好音玉響皓質冰鮮狎仁馴德習習翩翩
絕迹無泯於萬斯年

玉華宮山銘

唐高宗

順請峒山鑄芳金石道光軒駕聲流姬迹矧此崇巖
介通帝宅峻侔銅柱祥韜金碧飲渭南通鳴岐西格

炎生肇授彤暑初融高明叶序卜揆裁宮鳳標銜露
鳥跂捫空丹溪繚繞璇樹玲瓏徑分餘雲嶺界斜虹
流花縹景清籟嘶風波移控鯉雲飛御鶴沉沉松嶺
萋萋蘭幄霧宿重巒寒生洞壑峰高鳥路月對林垂
交藤散綠懸鏡成規鵝歸繞薜鳳下標椅崖依注蘚
池涵卷菴廣運堯心式昭夏諺端靈養白申歌祕殿
茵閣流霜椒臺凝霰玉榮則賞瑤池肆宴福壽無疆
華封斯薦

止戈樓銘

王世貞

太行之南寔為沃區臂魏指趙爰翼上都饗飧鋤
耒委蛇襟裾唯易有言需有衣袽用除戎器以戒不
虞赤堇之精鞬以歐胡剖列五兵利剗蛟菟鬱攸司
鈺厥名神樞胡以葳之穹閣彙起衡梗高疲崇墉周
庀包之虎皮倒載於庀夫既葳只亦永寧只匣有曠
缺橐有怨矢胡弗庸我竟老止此止戈為武斯義所
紀毋佳毋忘請俟君子

座右銘 并序

俞允文

余平居多病每念日月易耗而年且四十荒怠無成

懼終泯泯竊自痛艾思所以檢身之方偶讀崔子玉
座右銘喜其詞約而理至或可企而行之其後陳伯
玉白樂天輩並皆繼作雖大抵不及子玉庶亦略盡
矣而終非吾所自得因深省其闕續爲座右銘云
勿蹈人所嫌勿擇已所便當貴慎勿趨退而乃諱言
臨富慎勿希居而厭其貧勿皆委諸命已則不能勤
勿徇飄飄名反使喪其真固窮要之歿弱操焉足敦
嗜慾敗節義專貨則滅親浮言久乃賤多事生埃塵
伏謀促天紀荒慮耗精魂厚善難爲基纖惡易成根
善惡由一域共路險孟門幸慎戒之哉永永令名存

誄上

梁故度支尚書陸君誄

并序

江揔

君諱襄字師卿吳人也祖惠徹宋車騎府法曹行參
軍父閑揚州別駕齊永元紹曆蕭遙光謀反伏誅閑
以州職見害子絳其口并命忠孝之道萃此一門襄
時年十四號毀殆滅布衣蔬食終於身世起家著作
佐郎出爲永寧縣令累遷臨川王廬陵王法曹外兵
記室入爲太子洗馬掌管記中書舍人管記如故爲
丹陽尹丞俄遷太子庶子掌管記揚州治中太子家

令領國子博士管記如故丁母顧夫人憂廬乎墓所
服闋又從家令轉中庶子金掌管記遷中散大夫金
華宮家令出爲鄱陽內史除尚書吏部郎秘書監領
揚州大中正度支尚書太清二年三月京師傾覆君
竄迹還鄉吳民陸黯起義民攻郡擾攘之際憂憤而
終春秋七十有二余避世河滸暫之吳國百舍不容
千里無饋陸公國士之眷惠好之深朝同飢粥夕共
瓢飲契濶晤言流連晦朔日月逝矣懷古何忘臨哀
能誅久願搖筆時事屯邅不遑削藁梁季適越未戢
干戈陳世入仕累牽物役杼軸於懷四十餘載隋開

皇九年於長安致仕懸車已泊就木幾何但東海成
田南冠永繫龜山更促空想吹笛之哀馬角徒生絕
望通波之水嗚呼哀哉攬涕操觚乃爲誄曰

媯苗碩茂完裔繁昌賓門穆穆筮仕鏘鏘食采命氏
遐哉陸鄉四昇臺省八辟賢良分柯振葉令聞令望
玄蕤朱鞞翠弁金鐙流聲世祀列讚祠堂別駕貞烈
志存名教捐生狗主知歿不撓暉映泉壤痛此忠孝
於鑠夫子積德累仁韜光戢耀隱璞含真居哀能痛
至情通神淚枯壠樹哀感馴禽永慟家禍長號不辰
玄黃絕睇蔬布終身心符屈婞室等原貧分甘共感

內族外姻求之今古斯爲異人月下奏章螢前讀史
給紙蘭臺觀書洛市強學待問潤身爲已結髮濯纓
登朝入仕昂昂逸驥逐日千里宛宛長離陵江迅起
枳棘棲鳳化行乳雉平臺累陟石扇暫履跼伏不競
芬綵自理倚席無譏師訓胄子驥足時務俊民斯俟
秋實選能春華備美思媚儲后遊息承華書記策擢
爵命增加彈碁擊筑沉李浮瓜追隨飛蓋侍從鳴笳
二儀迴幹四氣淹賒離景遽沉前星奄滅撫已惟舊
懷恩守節昔荷故臣攀號聲折登高能賦大夫就列
金華式肇更奉清切修竹貞松含霜抱雪下車軒日

求瘼康時良辰坐嘯朗夜臥治懸魚化靜佩犢去思
廣弘條教精察毫釐典選搜揚操刀密勿不紊朱紫
傍無請謁秘署學林得人超忽延閣緝素校文遺闕
工妙鉛槧譽成朞月鴈行攸序龍作簡才讓珠不拜
賜劍恩來帝曰俞往爾行兼該金城失險玉弩流災
年臻几杖病息草萊世故天禍臣悲主辱露盡朝陽
風驚夜燭黃鵠超遙白駒何促事迫歸魂依然啓足
悠悠世路辛苦艱虞尋戈滿道暴骨交衢家無半菽
地絕飛芻念君桑梓零落凋枯傷君井邑子戾崎嶇
喪亂絕卜葵藿荒蕪淒涼故友擗標遺孤臨穴外野

撫棺窮途嗚呼哀哉爲善豈懼修名難假德履中和
道周文雅不朽之迹非謂泉下疊疊清風泠泠獨寫
嗚呼哀哉

盧記室誄

并序

盧思道

齊正統二年秋七月司徒記室參軍事永安鄉男范
陽盧詢祖卒先民有言惟德可久抑又聞之惟名爲
壽爾之無祿沒而不朽乃援弱翰告哀良友遂作誄
曰

皇虛眇邈師緒蟬聯大儒漢世名公魏年司徒藹藹

撫翼冲天尚書疊疊亦稱象賢若人擢秀絕後光前
發榮隨浦韞耀春田爰在弱齡孤根回立內無怙恃
外寡朋執行有餘力藝無不習善價斯待香名允集
下學上達鑽幽洞微九流百氏異軫同歸文成鍾律
韻響珠璣麗詞泉涌壯思雲飛雄州擢第言割其楚
我實褒然觀國而舉自茲不調多歷年所游泳儒玄
從容嘿語納於大麓崇建府朝八紘所掩車乘翹翹
我有明德乃應嘉招超自幕下來儀鳳條應徐金轍
潘顧齊鑣聲華簪帶譽動朋僚逝矣江陰承風請朔
莊生喻指季子觀樂立朝所寄俊才優學懸河自口

靈珠在握乃參軍事仍贊中鉉大冲所縻德施攸踐
 同推麗則俱謝蟲篆何才之高何位之鮮天下士也
 宜享多福豹變其文鴻漸於陸神之聽之于何不淑
 營魄遂往音儀在目嗚呼哀哉昔余與子分重契深
 譬諸投漆如彼斷金余慕大隱子惟陸沉等超宮閣
 金綴衣簪春臺共踐秋水偕臨還馬齊轡出蓋連陰
 良書濁酒永嘯長吟美言俱贊闕行同箴娛樂未幾
 嶮阻相尋折既無極憂亦難任云胡不吊亾我知音
 百年已矣萬事傷心嗚呼哀哉亭伯君山金嗟湮滅
 荀粲王壽同悲天拆蘭菊無隊鐘鼓不絕之子云亾
 何愧前列靈衣襲几奠酒盈杯故庭飛籜虛帳凝埃
 僕流離而涕泗驟顧慕以迴遲出南陽之舊道掩北
 邛之夜臺趙卿之銘已勒滕公之隴未開臨象設而
 不面詎幽魂之可來嗚呼哀哉

隋新城郡東曹掾蕭平仲誄

并序

陳子良

蕭平仲字某蘭陵人鄱陽嗣王之孫定襄侯之第五
 子也派清瀾於天潢分喬枝於若木君降生昴宿挺
 質珪璋孝友溫恭仁慈亮直其形曲而雅其神俊而
 明耽思羣書研精衆藝盡人間之能事極天下之奇

才江淮貴遊獨稱領袖故可以坐覲羔鴈俯拾朱紫
至如南山爲志不能北面事人詩書自娛耻與絳灌
同列泪有陳失馭西遷於隋而兄弟十人白眉斯在
棠棣之詠事等姜肱君子義之高其行也屬皇期有
道咸序縉紳乃拜吏部員外郎東宮學士冀州司法
參軍禮部員外郎新城郡東曹掾從班列也君莅政
能官咸熙庶績所在遺愛置言成範至如纓紱之士
草萊之客莫不聆家聲而雲萃食德音而風趨李膺
曩號楷模王商昔稱賢智方之蔑如也適應入踐常
伯超補台司如何靈祇殲我明哲春秋五十有五大

業九年二月十五日卒於新城郡之官舍嗚呼哀哉
余與夫子頗有親連少敦莫途旣同羈旅彌篤綢繆
非無陸機之書尚有鍾儀之操誰謂吉士奄逐隙駒
嗟乎盛年何時促之如此也嗚呼哀哉昔之絕絃軫
歎聞笛傷心余雖謝古人寧不悽慟是知身歿名存
寔由著述况復故人景行何能泯之敢以聞見乃作
誄曰

嗚呼哀哉粵若高祖大造惟梁德侔五帝道冠百王
赤眉作梗黃屋云亾有媯之俊應運遐昌君之顯考
耻爲委質在行旣高居賓坦逸篤生夫子如披雲日

儀形信典聲名本實機神電舉雅調風生還同照乘
有類連城學逾班固才冠劉楨金湯失險天厭有陳
幸逢隋德預沐堯民青蓋西度紫氣東淪依依去楚
悽悽入秦梁亳之郊忽傾風樹結廬狎鳥穿池憑霧
兄弟十人義聲咸布爰降綸綬特預銓衡龍樓振藻
司寇馳名俄居郎署昇朝擅美含香趨奏事禮承祀
抑抑威儀彬彬文史涪水旣臨鄴城是面視民如傷
事心惟戰周震善政潘岳能官企彼前哲顧已非難
余之室人君之從妹加以篤款頗蒙提誨銘之在心
沒齒唯佩契濶關隴連翩冀代余任主簿眉山之川

亟會琴臺兼遇名賢花朝月夜置酒題篇近之新城
暫申累日謂君積善永保元吉不言別後忽嬰斯疾
如何清暉奄辭蘭室嗚呼哀哉承諱驚惶聞喪慟泣
前悲未盡後哀仍集白馬不追素車安及悲人世兮
太促歎生歿兮異路玄壤冥兮難窮黃泉寂兮易暮
客位空而聚塵書臺掩而生蠹嗟古人兮神交念往
哲兮虛通淚有竭兮心尚感聲有止而哀無窮宿草
衰兮凝秋露白楊慘兮生悲風痛遊魂兮安在徒醜
酒兮招空嗚呼哀哉

文温州誄

并序

徐禎卿

故温州府君文侯景範幽玄日以綿邁國隕貞幹士
喪德程於戲奈何門生服義號慕忉惻追而誄之辭

曰

於昭府君執行峻潔約迹無雙優明典術行宦遠方
旣魯小邑法度顯明彊右拘攣惠化滂暢羣息咸植
公朝旌嘉疏爵天廡澤及蕃畜駉牝三千服憂致疾
去官歸田詔命督碎再領郡符朱輪入溫男女擁車
道不得行視政未朞仁渥威宣舉直致賢奸伏杜萌
狙諉格化盜不闖城平植市價繇賦稽程貪漁斷割

流冗徠恩務強教誨懸書告邑男樂處業女乏淫佚
睦族斷訟園土虛寂戶不舉女連坐罪慝淵德覃波
諸有喘息山海醜類翹翹首義解獷自訟公來何莫
仁格后皇穀穎岐穗潔心端操不懈於位風聲騰躍
布散海內宜居台鼎爲世作式其十有二年寢疾超
喪招徠弗獲士民騰號隣家奔弔淚灑河注攀悲市
道田野空耜山谷震悼回犢南駕州里悵訝不寤府
君奄忽而謝故舊隕涕彥哲傷慕而相嘆曰昔漢表
蜀郡魏振江夏府君繼武名跡不亞司命無良天年
不假千秋億世芳名難化嗚呼哀哉亂曰恭騫小署

聲問和兮黃朱申命德彌洞兮賢猶蹇瘁負皇棟兮
功與邵杜參伯仲兮神昊喪親命弗控兮南陽樹阡
式士頌兮乾坤悠永祀億萬兮

明徵君吳公誄 并序

皇甫汈

維嘉靖二十五年正月二十二日明徵君迎曦吳先
生卒嗚呼哀哉厥配李孺人先奪一載季子國倫痛
慈儀之奄背悼乾覆之俄殲茹荼銜諱勉襄協禮除
服起家擢省試第一越明年庚戌登進士第昭嗣適
德闡茲令名公亦可謂不灰矣然猶感鼎養之匪逮

虞潛懿之或湮乞余作誄以累芳行古稱大夫之才
臨喪能誄是故序悲婉切遠劣潘生綴藻纏綿上慙
陸史嗚呼風摧寧樹歲閱陳根榮始哀終亮爾情素
爰采遺絢辭惟永慕辭曰

邈矣延陵猗歟祖烈奕世毓靈迺誕英哲繕性慈躬
抗跡砥節幽履金貞清標玉徹曾是古心先民有逸
抱甕灌園帶經力穡蹈道遺榮陋茲乾沒緬彼漢陰
機將永息傳稱萊婦箴頌鴻妻化刑偕隱式敬賓儀
閑家禪壺福胤有基鄉閭表正籍甚音徽具邇懿親
推財克贍疇大吾宗寵弟曰憲敦賞斯勗遂膺嘉薦

無忝郭君人倫洞鑒慨昔披裘捐遺不拾管但揮鋤
視金如礫公介與齊楊生感泣義薄高雲心光皎日
亦有平子託歿巨卿堪也抱臂申訣友生嗟嗟曾氏
彌留在乳躬視醫殮善匪近名娛情墳典委懷琴尊
屏騎而徒棲遲衡門餘慶垂裕子孫寔繁天恒與善
人亦有言衛生有經致柔甘寂可以引年胡然奄忽
梁傾外庭蘭偃中室冥理難謀扁臺易卽嗚呼哀哉
荀令猶存謝公不歿鳳羽攬暉駿發季子文蔚楚材
屈宋方軌遯源會稽東箭之美些魂允慰茂行孔彰
振振欒後俾熾而昌椒非林實寶異池隍贈級賁壤
國著彛章嗚呼哀哉卉秀珍舒孝思不匱優游考終
自同蟬稅光塵雖戢芳猷靡墜述德徵辭庶幾黔惠
嗚呼哀哉

白貞夫亾室鄒氏誄

并序

黃省曾

惟正德十四年冬十月甲申白子配鄒氏卒蘭凋翠
腕鸞叱丹穴貞魂雲散華顏玉銷白子痛六龍之不
借念泉途之無返撫珀枕而憶芳言臨蕙房而追瓊
德携訣崇宵音容載聰玄目窈恍若平生青鑑縣
塵形幃虛月顧皓髮令母含悽蠖室周齡善女失恃

鴛鴦雖槁性枯情難捐遐痛况白子恩綢琴瑟道和
伉儷者乎江夏黃子覽擊哀悰爰爲短誄其辭曰
鬢今皇媛扶靈誕會玉姜降室江妃棲世性均冰素
德齊菑藹衣紕鳧孔帔鳴瓊瑋笄寅女範師門求締
有懿吉子桃敷結媿和遵姆篇恪供獎齊馬姬殊邈
桓姜婉嫺綽約紅顏倉皇永逝嗚呼哀哉旣遠兄弟
承事尊嫜夕勤雕幌晨肅洞房豆籩無怠居起有將
動合圖言蹈契金相儉比絺綌雅蒞繭桑徽心潛抱
嘉聲邇張春秋幾何日月且長嬰災集害履天逢殤
烝焉君子摧肝裂腸嗚呼哀哉薜華之容緬爲過客

孟光之賢冥宮長隔弱女繼抱靡可素悃大期載臨
塵年太迫邁魄焚煙招神舉帛侍姬室妾代身願百
白露零空爰開下宅旌搖搖今西郊龍馳馳今荒陌
淚淵淵兮流雪恨茫茫兮踴擗嗚呼哀哉珠被虛陳
鳳奩猶在扇辭柔腕鏡沉鮮黛遐背清軒飄遊東岱
蟾宇孤登高唐遠邁拂螭帳而悲歌無玉人之相對
慘華燭其無輝寂瑤琴之靜挂况是非之難明疑香
車而來避顧煩劇而致然實幽明之有界自淪絕于
移頃遂乖睽而異代嗚呼哀哉北風斯凜寒景照戶
仰庭蛛繞窺楹鳥墮申殷憂之爛熳悲蒼穹其隕婺

彼重漠之悠悠亦安知乎情愴欲往就今無津梁庶
夢寐今逢嘉婢猿悽哀今嘯壠松蕭條今號墓命之
比今蜉蝣柩爲隣兮狐兔靈嬋娟今何之恨煩冤而
無度請泝觀乎漆園倘清懷之庶悟嗚呼哀哉

滑尹張嶺山祖妣哀誄

并序

盧柟

嘉靖三十三年三月十七日滑明府張公祖妣大夫
人計報至濬盧柟素衣縞馬聯詞越境就其主再拜
哭且爲之奠禮也義月罷彩哀雲結觴庭瘁纖柯池
凋素芳痛泉室之永隔悼蕙帳之如存想殯位而軫

念撫靈衣而霑巾國蘊閨彥之思家墮母儀之泣輒
興辭於下陳冀旌德於罔極其辭曰

渾胚旣劍象緯殫形式維綸紹肖以儷營緬彼岷梁
閔閔締初蘭光啓度金魄降精鍾茲美媛於蠶之里
奇馨苾葳豐霽迤瀾幼而嚴凝長則斐疊棲景昭華
應圖女史待年旣至比跡乘龍玉笄載珈毒掃有容
如山如河象服是崇懿此昌軌惠我王風鵲巢旣居
泉水斯賦孝先蘋蘩敬惟保傅陳詩挹藻襲禮思裕
展如之媿緝其永祚兆運冢嗣發祥元孫岐函蔚鳳
冥海飛鯤影礪方輿聲蔽崑崙芳猷殫著義訓聿敦

闔闐風清簪襦霜屑春融宗嫺秋照滅獲弋綈在御
紛華匪悅壺政淵宣陰英之特造化沕穆幹流變遷
氛翳晝晦靈散宵捐瑒質既毀瑤魄無還隳音虛漠
佇彩空煙嗚呼哀哉閨扉晨啓素帷夙開盪醞微陳
槃飧將頽幣銷殷沃襃組髮鬢遑遑有求莫之能咳
嗚呼哀哉鵙鵙鳴兮黛草殘秋風起兮變羅紈音容
靄兮長夜暮金膏滅兮華篋寒雲仍擗其號咷私倩
痛而汎瀾顧視天之夢夢雖蹈地其何攀嗚呼哀哉
大漸斯臨四顧徬徨執手啞吧神色沮喪願遺言於
白馬杳萬里之莫將卒飲恨而長逝寄永愛於琳琅

廬山之邑巴水之鄉壘馬鬣兮啓玄臺綏靈寢兮壽
黃腸諒佳城之不可渝兮享千萬世之休光嗚呼哀
哉

故學士華公誄

并序

俞允文

萬曆二年夏五月二十七日庚子明故侍讀學士奉
直大夫華公寢疾卒於里第春秋七十有八嗚呼哀
哉公邃學懿範卓冠人倫長譽弘風白著海宇特懸
謬賞彌積歲年未覲光儀遽淪昃景季子水部克纂
先志仍遣訃言知音永乖有感偏識夫悽愴之旨以

誄爲先遂用誄之以累至德是知徐君墓樹終偃芙蓉之枝太尉帷牀不歇桂椒之氣其詞曰

邈矣遐胄宋之公族蟬聯條兮允惟戩穀晉有孝子至性天篤天降之祚以衍嗣續爰居毗陵族彌熾興越有千祀公斯挺生純諒閭敏夷粹淑靈含稟茂德弘劭舊聲弱齡摛藻秀拔人羣敦行孝弟研幾典墳麗辭合趣達意成文豐才厚蓄廣記洽聞學優時至升朝入仕翺翔翰林超騰逸軌紛綸弘經深湛析理靡曠不索無微不啓芳風颺颺讒口鏘鏘志隆位屈欲往違方迴跡民部出督淮糧託疾求免隱括韜光

旣塞而通乃佐兵戎有此顯畫寵命是崇金召儒碩入侍彤宮雜難疑義以闡道宗公秉撝謙辭還舊秩亦旣纂訓光昭懿實竭心亮采以贊王室遂遷侍讀金幣載錫旣建東宮詔諭殊俗屏斥贖賄傾夷震肅會置宮僚尋擬經局青蠅一穢終能點玉公復翻然乞覲歸還旁闢園沼娛侍承顏親反不怡旋起朝班養隆雖敬順志爲安閱試兩京甄拔湮淪濟濟豪彥多躋顯尊帝曰汝賢將傳儲君人之醜正卒以訕聞清濁異源進退惟時公之攸好匪爵能縻允慈矯節曼容知幾棄圖獨善懷我秉彝乃葺家宇乃振初衣

高謝纓紱益究辭棲剪剔蕪音以發清機機要之妙
曷盡於辭抗義尚行周亟振窮親疎加恩靡間初終
結友恢賢能開心胸風期之昵萬里遙通亦旣家居
城府罕至言念城守狡寇橫恣首輸私錢堅其險備
衆始奮作卒免陷潰且議時艱田野是經蠲徭科畝
害去利興鄉邑感德置祠見情居家入仕爲世作程
中歲好道端居保神精粹爲徒湔滌穢氛頽齡可制
還童反真如何不吊殲此詰人嗚呼哀哉生必有死
位不滿德自古云然疇能不惻良璧掩耀秀木委質
行路增欷曾是爲戚余以末學貧病荒沉罔或交頽
嗚呼哀哉

謬筆通心修承哀訃悔余素襟溘焉往矣莫報知音

續文選卷第二十八終

續文選卷第二十九

明平原湯紹祖公孟撰

誄下

建寧張府君誄 并序

王世貞

嘉靖戊申夏六月八日故建寧張府君卒於虞山之
里第春秋六十有七府君國器非凡公車蚤對三爲
法吏張廷尉之不寬兩刺雄州吳河南之第一薦剡
婁上除書垂下而竟坐非構遂息扶搖氣色施於泉
石羽儀僅於鄉里餘事潤屋壯心察眉豈非明哲自

藏舒卷委運者哉在昔楊惲廢棄田彼南山始借聲
伎以逃終罹怨望之謫而公沒齒無伎讀書自願優
游造物以永令譽嗚呼休哉某也齒後未獲從公之
杖履公實俯締姻好時申德音約我虞山大嶺邈如
未遂而今已矣嗟冥駕之異驅念手蹟之在目追爲
誄曰

顯允府君鼻祖自畱播於虞山寔滋以稠驛驛皇祖
筮爲國僚以逮迺考樹惇靡尤是生府君天質秀特
蒐於藝圃發羽飲的甫冠登朝外史是繹旣理憲比
夕若警惕吏所弗解士所未醪合而爲一收精紉刻

翁赫中璫亂我國綱公嬰其難詳本略芒詳之伊何
元憇孔張孚號用厲王威斯揚略之伊何族屬孔棘
渙汗用休庶慮斯謐初命吉守宅憂未集載命煌煌
于建之陽昇建士女以莫不慶樹爾田禾酌爾酒漿
若亡吏胥曷號於鄉耆老嬉遨童稚謳謠卽頑解獷
滌思奉曹自訟於閭曷煩市朝考第書最陟明迺當
胡其皦皦而逮口網愛者其下惡者在上誰云弗勝
挽幘泣巷公之歸來拂衣悠哉汲瀑故巘倚檜叢臺
黔鬢朱顏簫鼓循垓望爲神仙寔聖人孩眺公之鄉
儼若通德積穀飄氛鳴珂耀色窺公之門麗若倫侯

華棖承日栽棟雲浮登公之堂何異謝家玉樹挺秀
芳蘭競花入公之室一榻蕭然左圖右書支願其間
宗黨姻姓待而舉火永無飢瘵以卽寧堵隣比左右
相從無忤歲有儉臧割以紉予疾胡弗仁乃嬰斯人
謝玩却嗜用全厥真屏慮調息熊經鳥伸謂期百年
而塵六旬溘焉就冥何續其生盍去披猖而喪老成
遠邇嗟叱州邑贊評嗚呼哀哉彭澤高枕東山逸駕
始績旣睽後畧獨暇春遺煦日秋饒輝夜公出其餘
嘲弄元化玉蘊於積芝榮於祀公斂其餘貽燕孫子
我申誅詞以備張史嗚呼哀哉

通政司叅議張公誄

并序

王世貞

歲重光作噩之畢月故通政叅議張翁捐館舍春秋
七十有七翁諱寰字允清蘇之崑山人世有甲第聞
於熙朝至乃考奉直公貞夷簡亮弱冠味道入蜚南
宮之聲出敷西門之績以畿郡滿考幡然乞休天
子嘉之晉錫蕃庶遯肥考槃賁泉石以金緋騰雲霞
於竹素優游大耋顯融令終風流所貽談者口實翁
穎朗天授淵源家派旣舉進士釋褐三典雄州咸有
子惠浹於邦人稍遷秋官員外郎以愛行法民稱不

寃居無何念奉直公高年乞歸養華顛在侍嬰孺羈
慕服勞寢興胡耆安旻旣以天年奉奉直公終瘁毀
立骨餘性而已居喪廬墓有乳燕之祥薦紳先生屬
詠成什御史廉得狀異之上翁孝廉不報服除補故
秩超通政司叅議銀臺通奏之司爲 帝喉舌紫宸
秘嚴之地若接罄咳盛年宏材處之不疑謠詠當心
精彩刺目遂用廟災援例得賜骸歸湖山故盟口未
寒林泉則夙心頓委尚平之微累旣畢玄度之勝具
獨著或扁舟苕溪雪水之社或短屐武夷匡廬之頂
千里孤駕母齋當時之糧門生故人爲開康樂之徑

若乃志慕奇書手追名墨薄蹠尺一魯縞齊紈醉瀟
灑澁家至人屬春容寂寥汎言旁酬七步未穎八义
猶蹇足貴太冲之紙奚取相如之毫尤以多通樹道
下引爲體林宗人倫之表太丘長者之風陽和溢於
眉宇春華粲乎齒頰足使初交頓舊後進忘新旣遠
游趣深坏瑾殊薄陸有思光之舟水具志和之宅太
嶽思御瀟湘動流三游在念有成言矣一疾委瘳遂
爾長往嗚呼哀哉乃子某等以世貞夙奉矜矜寵之
小友使操觚翰爰播旃素夫誄以志哀揆所由起魯
圍歿綏之勇泝督維係之戚叔持甘法仲武蚤夭故

使詞客陳些太師采風起沈浦之懣冤回商秋而就
輿今翁乘化去留無忤終始備福者五不朽有三亦
何哀之有哉然使盛德就徂則百年猶短高風永闕
則百身曷贖鉅城峴首殊抱荆民之泣太傅西州尚
起羊曇之慟爰恂舊典誰云不宜誄曰

族由令滋人以賢貴有斐壯武般般其裔播遷於吳
婁起高第仲臬于襄叔也藩寄食德者何伯有喆嗣
褰帷三輔脫屣雄刺蓬蒿自若松菊就植夷猶清泌
卒以完逝夫子挺生弗墮其聲水鑑朗悟機神洞靈
射策公車苴茅連城自濟而濮益稱仁明訟獄時往

謳謠互聆百堵薨薨衝波是馮彼莽萑蒲伏戎馮陵
捷若承蜩有泯弗形三牧于開目亦無全瞶甯匿豪
沒爲公田犴鮮孳纍閹饒母錢守橐如滌齋厨蕭然
單車就徵泣愔閹閹曰爽鳩氏 帝用旌賢峻坂未
躬白雲橫目志養斯榮大孝匪祿扶持以終居然嬰
服溪淙寫哀林飈助舛援琴乍弦弓旌交屬汝作納
言司 帝喉舌唯斗離辰莫喻親切終風自南讒口
回穴桂冠神武上書北闕七尺自如百組誰繫叢桂
含滋畹蘭生悅維昔謝公竟阻東山樂通失侯憤疾
于田寧如夫子心形默全瀑布界空幔亭衡煙地肺

幽阻天目蟾蜍三江五湖衣帶之間鶴髦華陽煜如
神仙彼美司空遯於孤城皤皤黃髮三四老成書謂
夫子江東步兵白日未駕青山可盟把臂竹林飛觴
蘭亭履舄所抵一坐盡傾談天膾口懸河啓粲季野
陽秋汝南月旦後進爭輻名流忻讚雌黃既絕吹噓
獨擅陋彼嗣宗流思中散藹藹眉宇便便腹腸四候
維春九曜絕霜入羣不亂汎跡母亢市隱岩通漁麓
樵江莫或名之亦莫可踪辭取師意書繇匠心遊戲
墨池縱橫藝林元常凝思子雲湛深卒以不朽人用
子箴子曰母爾余暢余襟弗鑿其天孰古孰今汗竹

緗縹流黃紈白朝披夕灑有請必獲戶競靈蛇人譎
拱壁不翼而蜚徧我南國蒼蔚窮簷叫窳陰壁亥步
所艱見子題蹟嗟予眇小龍門是登塵尾胡牀蠅蛸
欲扃圖書在垆蘭桂在庭惠而好我携手同行焉知
來者謂余後生疇昔之歲余丁家禍繾綣夫子寔來
唁我渥丹其顏飄鬚綰媚五嶽之期唯子是控美疢
見蠶曾未改火僕夫飭轅餼糧就褁瀟湘之思擲筆
而化嗚呼哀哉天期既迫塵游曷藉桃源不春柏房
長夜翩翩素旒輒輒靈駕露歌未晞巷哭人詫矯矯
夫子寔超生死應迹而來乘理而逝銀艾其表蘿薜

其裏傅子隱逸非子之始傅子名卿非子之止微言
可述徽容莫紀玄心慧覺佛輪儒軌嗚呼哀哉

禮部主事華起龍誄

并序

王世貞

明萬曆甲戌之夏五月故翰林院侍讀學士華公卒
其季子禮部主客司主事叔陽字起龍以哀毀得癘
疾明年秋九月竟終於苦次春秋甫二十有九嗚呼
哀哉楊仲武之清才儁茂王子安之藻理秀發並以
茲年而同歿厄何造物之戲人驟予而驟奪也起龍
少負穎質風標鮮令爲學士所鍾愛訓勵尤切雖銅

盤別食寵異等乎道彥而青衣受檟切磨幾於廷碩
柔愛義方庶幾金行不悖矣以故舞象之歲褒然邑
庠歌鹿之秋甫踰弱冠凡有撰述膾炙人口尋舉進
士高第拜工部都水司主事出視稅武林非其志也
內迫晨昏烏鳥之戀外慕汗濁蟬蛻之趣懇疏引疾
予告南歸溫清之暇縱心邃古模楷作者蓋卓然有
成矣旣告滿三載補刑部四川司主事委積館舍不
忝懷方之職填繕巾脂無煩鄭僑之對至於鉤剔奸
隱祛掃宿猾雖謔狂響行之自如尋以念學士乞
歸星言載馳獲伸無方之養者踰半載俄而學士疾

亟湯藥躬調遂有剖股之舉含殮甫畢遽成毆血之
慟哀慈在堂二稚依膝割戀人世追踪泉臺諸所未
終一念畢矣夫其汪洋竹素揮霍毫翰颯若風鳴落
若霞舒雕蟲之士往往魄奪而務在剪裁雅托冲淡
乃其就者亦既斐然陶謝之藩旦暮可啓而又旁通
釋典兼曉宿因臨池之染多托經藏性不食酒而從
容欵宵居無雜交而慷慨傾橐至於名畫法書商彝
周鼎揮金懸募幾侔秘苑此子無死故未可量也子
之元配實余淑女圭璧表其圓方鸞鳳協其鳴和天
之不造先子而天帳蕙久荒墓草載宿而余猶棲遲

世途俯仰物變以此言哀哀可知已乃作誄曰

天族惟殷華為國楨魯紀司馬貴而不名右師睥睨
卻楚以情嶠寔顯晉厥宗通靈孝子絕婚嗣乃繩繩
其麗不億以逮于明四業驚馳衿紳勃興子之先君
藹藹吉士橫經虎幄紬簡金匱處榮能割未滿思退
匪爵而封爰政鄉遂聲華四垂門故三事晚而道搖
與物靡際其心則長以貽善繼子之覽揆鱗祥在夢
藍田嘉玉丹穴威鳳秀朗天植穎悟如縱累紙立掃
千言闡誦公車之作世所摹風鷄山歌鹿龍江攄虹
伯既難兄功孰與仲取標南宮射策金馬雋掩同升

芳馳都下洛陽少年正平大雅車停縱觀紙貴傳寫
降心玄古力絀輕冶俯仰時人和者寧寡厭跡水部
脫囂梓鄉齋慄夔夔退而洋洋跌宕詞林從容藝場
靈威古文金薤琳琅倫躡嵇鎗敦夏爨商不蹙而趨
集子之堂長卿自娛文園養寂王程外嚴親命中迫
寅恭秋憲神明三尺 帝曰汝良改隸宗伯周氏懷
方漢典屬國子始爲政剔其垢積賓至若歸吏怖徒
匿道行九夷聲流重譯陟岵興懷循陔致思嚙指高
堂使我不怡神虎朝掛雲龍夕辭歸者及門病者起
帷如登春臺如含醴飴旣翕且耽將永天期天期驟

迫奪我嚴父冠無晝懈寢不夕處回生可希敢愛其
股嘔血長號鷄骨支柱曾不踰年追軌九土子之衰
慈蚤暮悲啼子之二孤或泣或嬉建禮清曹天衢甫
夷素侯之藏南珍陸離凡子所戀一旦若遺天旣奪
之昔胡貽之嗚呼哀哉星隕珠沈蘭摧玉折鍛羽鶴
雛傷蹄汗血密戚哀攢英游痛咽濬冲歿孝長謙才
絕人孰無悲悲子爲烈子之遺文百有餘篇銳情魏
晉旁謝及顏已窺厥藩惜不假年其骨雖朽其言足
傳子無沒眡余操子權英英淑女獲配君子先子而
往以身薜蠶若父乃舅亦且老矣仰林天裁俯慨人

理臨穴莫從纏恨桑梓嗚呼哀哉

臨淮侯李公誄

并序

王世貞

萬曆甲戌秋九月都督畱守諸軍領中軍府事臨淮侯盱山李公以疾請解機務詔許之公之冢胤言恭方統熊羆不二心之士環衛左右上書請急扶侍輟直以行又三月而公捐館舍上爲震悼罷朝賜祭者五黃腸題湊象廬之墓一切自尚方給造禮也公之先世恭獻王以長厚托肺腑武靖王以雄略長爪牙遂啓大國從祀高廟鼎革之際疑跡失封中興

之朝優詔光復易世載德不忝惟公公孕女斗濯濯之秀負淮泗湯湯之表研洞韜略敦詩悅禮世廟丙申之歲踰冠襲侯天子有事園丘上皇天大號公以虎翼慮無駿奔陟降特拜蟒繡裘蹄之賜先後持節冊封周藩及遣祭榮吉二邸視不過禮自泯軍成之灾賻必以禮何取宰咀之誚已事過反母淹館薪遂佐畱省右軍之帥晦智杜權任真推分榮戟之地凝塵湛如也竟以材武茂異推督江防戒嚴受朕之旦勵節絕甘之守時適有島寇流犯內甸公出次江滸以成誓衆餘皇蔽空視一麾而進止組練曜

日唯余馬之所嚮蒼兕呼而妖氛息素車退而怒濤
歛水奏鯨鯢之戢陸鮮鳴吠之警尋有 詔入領左
軍都督府河內陳借寇之辭美稷弘待期之信還理
所任遷佐督留守諸軍璽書褒美優贈三世比於周
宣之召虎諸邦艷之俄度支弗繼士用流言披猖脫
巾倉卒倒刃公佐其長以柔道宛解徐置諸理祭彤
著勩獨蒙逗遛之徵汧督完危弗寬貿首之妬甫爾
解綬尋蒙賜環進領左軍再被江寄進平蠻將軍爲
全楚大帥勃盧谿子之銳咸縛長繩墜首卉服之頑
爭謹短韻行商樂乎野次遺秉安於棲畝入長東樞

出總漕政公銳思善後詳不盡力所上五議朝議是
馮吳會之飛艘相尾每先告期敖倉之積粟如山更
憂陳積夫蕭相轉餉特表元勛車侯富民乃昭至意
而公以微文見詆還佐其府俄而漕功就白 人主
偉其事而嘉其不伐改統中樞督畱守諸軍事陪京
大小庶務悉以委之竹馬遵滸袞衣在洛太尉之節
甫入臨淮之令尚新 天子以六軍大帥貴在得人
元戎啓行 溫詔敦促公念母太夫人老不能奉板
輿而北上書力辭至再始拜 俞旨原廟之衣冠出
游誰爲執御光烈之紛帛猶在時當護存公以宿將

之隆受祠官之托厥意深矣溫清之美芥視三公菽
水之調甘踰五鼎 天子雖難公之情而弗釋其用
竟伸畱守前命七萃三翼之輩精采頓新長于大桁
之間謹呼載道公簡易持已含博爲政雖錫難老猶
歌來暮而天不愍遺一疾告薨春秋甫滿六十雖未
登上壽而享國三十有九年三聘諸王兩佐南北樞
四長其府一帥全楚握漕務佐畱守再督江防一總
禁兵未拜諸徹侯功臣艱大之任靡弗綰南北要害
之地靡弗歷璽書符印節鉞之頒無虛歲尚方金綺
楮幣珍鮮之貺無虛月言恭孝隆繼述材備文武昔

師望表海伋將虎賁平陽入相宙直禁藥代興之李
何以異茲顯則綸綍幽惟金石足以照耀東第黼袞
千古尤欲累生時之德行注送往之旒旌爰以不朽
屬之儒生爰紀榮哀托之客卿敬爲誄曰

漢有飛將唐推藥師奕世靈武昭聲鼎旂赫赫 高
皇托肺隴西以啓岐陽四張天威平犂二庭橫絕焉
支手擗休屠血我畱犁廼開大邦及嗣而微元康求
舊錫金公乘至我文侯爰七其命七命伊何匪號匪
鄭淑旂綏章勇爵鑿鏡三藩之禮侯始爲政風談掩
靄周還慎靚赫彼畱京王業所馮我戾戾止如雷如

霆樓船在江練凱自鳴蠢茲島夷惕息奔崩儲胥不
驚以翼 孝陵弗逞悍士仇我司計三事大夫首鼠
匿辟侯曰母爾汝育汝事國有三尺汝母自勵攢鋒
浴水抽矢叢蝟片言立解削彼豪橫躩踞層關賴爾
卽安如何壬夫搖之筆端闔門養重閉閣謝讐玉節
金符以靖楚藩紆爾戎韜捷彼荆蠻侏馱與歛魍編
請冠彘集六軍寄命於漕 帝睠中顧曰吭脊腰拊
循其師以爭風濤爲雪千廂如雲萬艘輸無後期士
鮮告勞鄴旣肩庸滉乃愧驕鍾山龍蟠石城虎峙永
奠南極上公所理惟侯再命斧鉞弓矢車熊大桁竹

馬江汜肅肅徒御粲粲門子介冑徵文棨戟象禮三
十九載珥貂垂瑜如履室堂中權左樞如鴻北南天
京舊都壓絲螭文燭銀裘模貝帶翽翽朱橐僕姑賜
無虛月庫不絕書棟橈示凶河魁告變喆嗣祈天星
信飛傳百身曷贖一往奚戀陋彼苟視母煩史諫傾
都雪涕中朝流唁訃音上聞怵我 聖皇蜜印朱芾
栢榔黃腸鼎烹以享悉從尚方介士輕車歸侯於藏
易名之典以俟太常元勳肇國紛莫可紀金貂網蚤
旅葵生圯侯興繼絕今聞遐邇有子而賢世濟厥美
曹社之木其橋覆梓俯仰遺德侯誰在矣嗚呼哀哉

孝豐吳宜人誄

并序

王世貞

古誄贊歌頌少著於閨第之懿者言婦德不外見也
 乃若純動誠格自掩彌布淑教所施溢於閭右貽厥
 孫枝此何以例焉王子曰予讀吳太宜人傳而志之
 太宜人事其姑謹姑病再割肉作糜進病良已卽秘
 之弗復語於人相南山大夫起家甲州郡而好施予
 鄉之無餽者凍者骨暴野者川無厲道無塗疫無胥
 棄繫大夫是頌有丈夫子二伯佐廉訪仲叅政行省
 率其教所莅有聲實諸孫維嶽以文學位郎署少者

朗秀林立盛哉敬爲紀之其詞曰

濯濯宜人佩芬結英夙昔婉婉內閑未章作嬪於吳

吳宗之慶爰相夫子配發厥祥一伊何蚤邁離孽於

姑我姑未遑曷恤其膚矢神自割載告迺逾以終

考左右服扶二夫子克寄閭政是齊逮逮千指曷聞

嗚嘻歲時蒸嘗潔鮮殷肥體絕阿錫首靡華筭三以

儉成豐以豐侈予左粥右糲以待鰥寡亾暴中野亾

暍行旅豈曰季從豈曰姊舅四凡我吉民虔祝吳宗

惟吳之豐我生曷恫赫赫南山是采是馮匪著閨祗

賓啓家邦五伯服憲紀收輯嶺粵周道中否弗咎其

轍仲司考功如鑑斯別金協肥遯以貽象德六南山
 不騫咸澤儷肩榮芝產秀謂期億年忽是中涸人理
 曷延環邑隄側宗姻洎漣七仙姿不春玉魄長夜忘
 憂悴堂合歡委榭總帳風捲粧臺霜却月支罷香疇
 返靈駕八姑謂令婦子曰聖母四德咸懋諸福萃與
 豈無刁嬾氓蝨財虜亦有姬姜女則奚媿九德曜可
 字公父嗣賢玄霜屢易徽音邈綿我因聞孫敬圖不
 刊敢托彤管播之素旃十

大司寇箬溪顧公誄 并序

王世懋

歲次乙丑九月七日明故南京刑部尚書顧公卒嗚
 呼哀哉天壽平格國恃老成如何不遺畧我典刑自
 昔先民始也有卒維生莫聞維歿何述矯矯司寇生
 榮歿哀哲人之懷如彼梁摧何以興哀言宣其辭何
 以誄德言樹之旂遂作誄曰
 猗與顧公奕世流芳姓冠江左胄隆晉唐丞相始基
 元公再光爰及公祖葆德含章乃誕厥考維慶之餘
 技挾扁倉德覃井閭茗溪之卜自我勾吳湖山環管
 以鳩其居神光告靈麟祥啓夢是生偉人協此隆棟
 生無童心弱不好弄文抽藻敷德朗器重弱冠登朝

結髮佐治政稱神君獄視老吏入叅衛尉權倖所蒞
維公司直不貽其愧引身外補綏此粵人大盜載起
王師屢勤公奮其武威靈用振勒功荒徼時惟虎臣
逆藩告禍王命爾將豈伊不虔畏此官謗垂翅西陲
振鱗南向彼讒之人不勝公望桓桓中丞仗節昆明
家難在告不遑寢興冒禁投閒垂十五齡峴山之社
以集羣英國以親違忠緣孝著滇夷弗靖乃眷南顧
僉曰公哉康我國步旌旄載臨甘雨如澍入叅嘆舌
晉備股肱惟大司寇爲天下平義形於色盜臣用憎
乃遷南曹實維舊京居秩宜勞乞身止足抗情懸車

返志初服濯纓清苕振袂天目天之聽之貽我戩穀
學貫經史數窮始終歌賦旁游草隸必工靡德不舉
靡藝不綜後覺稟素異邦從風誰謂河廣龍門控流
誰謂德難大雅鎮浮庶其期頤永瞻德猶如何不弔
奄忽彌留嗚呼哀哉二豎何虐來病君子俾我後生
靡瞻靡恃卿雲掩輝南箕墮尾泰嶽摧觀洪流失砥
嗚呼哀哉追惟疇昔謁公湖濱屈體善誘示我同春
二雅旣列四始是陳鹿鳴登歌以樂嘉賓容止未違
德音猶在居無幾何天祿告艾我登其堂有白其旆
鐘鼎絕陳劔履辭佩嗚呼哀哉龍輻戒途出次于郊

續文選 卷二十九
狻輿罷御素驥悲號王命賻祿有光雲霄蒼麟玉蚪
天路飄飆嗚呼哀哉

哀

陳文皇帝哀冊文

徐陵

維太康元年太歲丙戌四月丁未朔二十七日癸酉
大行皇帝崩於有覺殿殯於太極之西階粵六月丙
寅將遷於永寧陵禮也宮車晚駕幄殿晨張旌銘具
列綉翻成行哀子嗣皇帝諱擗蜃輅於丹陛攀龍帷
於紫庭趨過窮於屏闕拜慟感於明靈東京飛其瑞

露北陸實其祥星乃詔雲臺之史稽採咸池之曲叶
大雅於鳴金同藏書於羣玉其辭曰

若水傳帝薰風御民重光所集世載於陳赫矣高祖
悠哉上旻蟬聯寶胄暉煥郊禋我皇誕聖膺此家慶
道王衢罇神凝懸鏡洛書天表河紀靈命納揆馳芳
賓門流詠稽陰克伐震野勤王亳道增構幽風會昌
言瞻少昊實杖高陽駕彼軼轡清宮未央歡覃兆庶
德泊遐荒穆齊高寢上膳長樂肅肅承顏哀哀薦酌
悼園恭儉章陵謙約大寶崇名無聞改作纂武升歷
遺憂寔繁三湘九派沴氣雲昏力折天柱才傾地門

甘泉夜照細柳朝屯谷魅山鬼橫流塞源赫赫英暮
赳赳雄斷遍行天討無遺神筭鬱掃江淮長驅巴漢
九夷百越雷隨風渙北倂昆邪西戡伊軫荷負皇極
劬勞庶幾勤民聽政晁食宵衣服貴綈皂風移闔闡
唐山罷奏濮水韜徽訪採狂狷搜敷仄微世感中孚
民惟大畜外戶無閉高垣奚築降情儒雅疑懷庠塾
御廡爲歡臨雍彌肅禮兼三代樂備九成天資武德
地照文明墨履斯在幪巾自清連珠合璧曜爽流精
獸舞時豫禽歌頌平帝載維遠王靈維大候雨占風
荒中海外憬彼鞮譯咸承冠帶是曰君臨斯爲交泰

白環已貢玄珪克貞東河佇楫北狄思征鉞斧將戒
璵玞未鳴星淫去楚日沴悲荆億兆何豐穹旻遽傾
嗚呼哀哉大禹胼胝重華腓腊仰惟勞務同斯違懌
吉夢無徵昭祈奚益聽茂陵之鐘鼓抱喬陽之劒舄
詎髣髴於宸儀終纏綿以號擗嗚呼哀哉三占以吉
四海同奔列明天宇崩號帝闈千門啓於閭闔萬乘
警於靈輶槐風悲於輦道松雨思於郊原鑿旆動而
虛蹕宿衛靜而空尊嗚呼哀哉畢陌平夷流山蟠固
紀無遷市唐有通樹經白社之修途廻青門之廣路
思沛邑以東臨懷周京以西顧嗚呼哀哉機神不測

性道難稱克窮靡寄孺慕奚憑唯封雲亭之與禪父
肅玉牒之與金繩揚英聲而永久共日月而俱升嗚
呼哀哉

隋元德太子哀冊文

虞世基

維大業二年七月癸丑朔二十三日乙亥皇太子薨
於行宮粵三年二月庚辰朔六日乙酉將遷座于莊
陵禮也蜃綉宵戴鶴關曉闢肅文物以具陳儼賓從
其如昔皇帝悼離方之云晦嗟震宮之虧象顧守噐
以長懷臨登餞而興想先遠戒日占謀允從庭彛撤

祖階卍收重抗銘旌以啓路動徐輪於振容揆行授
名累德彰謚爰詔史冊式遵典志俾濬哲之徽猷播
長久乎天地其詞曰

宸基峻極帝緒會昌體元襲聖儀耀重光氣秀春陸
神華少陽居周軼誦處漢韜莊有縱生知誕膺惟睿
性道觸日幾深綺歲降迹大成俯情多藝樹親建國
命懿作藩歲彗先路舄奕渠門庸服有紀分噐惟尊
風高楚殿雅盛梁園睿后膺儲天人叶順本茂條遠
基崇禮峻改玉參墟奄有唐晉在貴能謙居冲益慎
封畿千里閭闔九重神州王化禁旅軍容瞻言偃草

高視折衝帷宸清秘親賢允屬泛景鳳瀾飛華螭玉
揮翰泉涌敷言藻縟式是便蕃思謀啓沃恭惟積德
豐衍繁祉粵自天孫光升元子綠車逮事翠纓奉祀
肅穆滿容儀形讓齒禮樂交暢愛敬兼資優游養德
恭已承凝南山聘隱東序尊師有粹神儀深穆其度
顯顯觀德温温審喻炯戒齊箴流連王賦入監出撫
日就月將冲情玉俗令問金相宜綏景福永祚元良
神理冥漠天道難究仁不必壽善或愆祐遽瑤山之
頽壤忽桂宮之毀構痛結幽明悲纏宇宙慟皇情之
深憫摧具寮其如疚嗚呼哀哉迴環氣朔荏苒居諸

霑零露於瑤圃下申霜於玉除夜漏盡兮空階曙曉
月懸兮帷殿虛嗚呼哀哉將寧甫窆長違望苑渡渭
浹於造舟遵長平之修坂貌鶴駕而不追顧龍樓而
日遠嗚呼哀哉永隔存沒長分古今去榮華於人世
卽潛塚之幽深霏夕煙而稍起慘落景而將沉聽哀
挽之悽楚雜灌木之悲吟紛徒御而流袂歛纓弁以
霑襟嗚呼哀哉九地黃泉千秋白日雖金石之能久
終天壤乎長畢敢圖芳於篆素永飛聲而騰寔嗚呼
哀哉

唐太宗文皇帝哀冊文

褚遂良

維貞觀二十三年歲次己酉五月甲辰朔二十六日
己巳大行皇帝崩於翠微宮之含風殿旋殯於大極
殿之西階粵八月庚寅將遷座於昭陵禮也鳳管凝
秋龍帷將曙溢化同軫綿區縞素哀子嗣皇帝某覽
風樹而增感攀銅池而拊膺迫宗祧之是寄傷往駕
之無憑奠樽盈而悲緒促靈景翳而愁雲興去劔滋
遠清徽方閱爰詔司存傳芳瓊字其詞曰

三微固祉五曜垂文光昭司牧對越唐勛族著玄牝
家傳縉雲高祖配天一人有慶大行神武惟幾作聖

良畫自得高文成性夙表餘雄先懷反正蒼兕爰發
朱旗首令寰瀛昏墊關洛荒蕪妖傾地軸盜弄乾樞
戎衣光啓霸政宏謨天兵電掃月陣風驅蚩尤遞翦
狹窳咸誅罔位不虔餘分興戾先收秦組次焚商袂
轉圜上略容光下濟從邑垂仁賓門灑惠修風順軌
凝圖奉曆青辰同規玄珠協契發輝三五聲明遐裔
汎野休兵靈臺偃革升巖藏銑遵河奉壁學肆徐輪
丘園散帛就日攸宜如天在斯形哀動植化美墳簞
樂華曾舉禮葉旁垂沙塲罄翦斗極咸羈狼山入囿
瀚渚歸池東旌若木西旆條支龍鄉委質烏服來儀

續文選 卷二十九
大矣乘時悠哉利見文龜浮沼應龍在淀滴露飛甘
卿雲呈絢松莢望幸瑤華方薦仙舟斂術星飛告變
凝沴氣於升年掩璿暉於離殿嗚呼哀哉商管初秋
飛弦罷俗驚川悠緬宮車晏出大隧弗營元龜獻吉
展軫效駕端圭司日迫靈心於將餞痛皇情其如失
凝秋林於廣路遡悲風於長術經栢梁而徐轉邁蘭
池而從蹕聳輕旆之逶迤動邊笳之蕭瑟嗚呼哀哉
周營甫竈漢啓泉闡穀林搖落喬巖變衰平原淒兮
白日遠深渚澹兮秋雲飛覽銅雀而興慕傷鼎湖之
不歸嗚呼哀哉峻陵玄壤嶠山窮路虛衛翻英輕馳
委素羲庭易晚松陰難曙萬方悲而雨泣三靈慘而
雲泣嗟厚德之長違仰高天而攀慕嗚呼哀哉崇基
永煥置業方昭遺風餘烈天長地遙想神襟而騰茂
縱史筆而揚翹籠嘉聲於日月終有裕於唐堯嗚呼
哀哉

唐太宗文德皇后哀冊文

虞世南

維貞觀十年歲次甲申六月己未朔二十一日己卯
大行皇后崩於立政殿粵九月十日丁酉將遷座於
昭陵禮也殯宮夕起靈輜曉前儼帷帟於空殿肅陞

續文選 卷二十九
衛於靈筵皇帝親臨宵載義深追遠瞻青蒲而永絕
悼玉階之莫返蜃輅將引犧樽已撤爰詔記言式揚
徽烈其詞曰

二儀合德兩躍齊光列聖觀象邦家克昌猗歟華族
英靈降祉比齊越姜匹宋踰子育德高門騰芬素里
體仁將聖披圖閱史造舟爲梁嗣徽前德履和思順
自家刑國淑問不已柔風允塞紉組執勤璵珩垂則
時逢昌聖運屬休徵代即膺曆唐侯嗣興紫宮金曜
黃道階昇化宣風始業贊丕承比德無競凝神不測
應物通理撫機先識體備賢能暉無駝側績包九亂

恩加八極性道希夷言容莊敬戒奢處約懷冲履正
景暖風暄霜凝水淨領略三古箴規六行源濬流遠
時昌祚延國貞誕敷皇支挺賢談高辯日學冠通玄
慈訓所及懿德光前五福云備千齡方永地紀絕維
月輪韜景晨興不豫德音彌整馬鬣無封鶴珠斯屏
嗚呼哀哉異人神於倏忽變容服于平生改清蹕以
哀挽易朱旗以素旌昔照朝景響環佩於增城今冥
永夜吟松柏於山楹嗚呼哀哉氣變灰飛暑退寒襲
烟觸樹而凝慘露分枝而垂泣聞哀鴈之夕飛聽悲
風之曉急仰雲霄而永慕慟陵寢其何及嗚呼哀哉

背玄武而北轅絕牽牛而橫度遂去去而逾遠馬駸駸而不駐想渭水之貫都歎黃山之隱霧嗚呼哀哉嗟人生之浮促若飄風之過牖牖何風而暫停人何生而能久唯承天與載物邈慈深而德厚邁任姒之高蹤播英聲而無朽嗚呼哀哉

昭成皇太后哀冊文

劉知幾

維開元四年歲次丙辰秋八月甲辰朔十七日庚申昭成皇太后梓宮啓自靖陵將遷祔於橋陵皇帝乃使某官某甲設祖於行宮禮也丹旄旣舒玄宮再闢

俶龍輻而命駕指鮒隅而卜宅哀子嗣皇帝講瞻蓼莪而罔極感芣苢而增傷嗟鏡奩之不御痛珠匣之沉光緬考前烈旁稽舊史顧西陵以永懷託東觀而書美其詞曰

觀津鍾社平陵誕靈作嬪西漢爲母東京地專戚里門承后族重睹玉衣再開金屋爰初笄總寔負才賢學殫詩禮工極絃絃方松等勁比菊齊妍慶膺懷月祥兆捫天膠東胙土濟南開國邦媛思才河魴佇德柔閑植性婉順成則六行畢彰四訓無忒粵自朱邸來昇紫薇政成闡闡化穆閨闈孕毓三母牢籠二妃

續文選 卷二十九
桃天闡譽萋藹增徽五福多爽百齡過隙地裂方祇
天傾圓魄歸神蒿里滅彩椒掖德音若存儀形遽隔
嗚呼哀哉痛鍾宸辰禮極哀榮謚踰光烈儀比功成
尋周闕之先夢奉堯門之舊名撫遺鏡而增咽攬賜
衣而疚情嗚呼哀哉龜兆協謀龍輻戒轍指黃山以
徐轉背青門而永訣挽鐸鏘其競喧旒旒儼其齊列
萬國慘而潛怛六宮悲而慟絕嗚呼哀哉遂入松徑
園歸穀林見寒山之月落聞拱樹之風吟玉座空兮
壽宮寂金缸閑兮泉戶深想清徽之不昧寄彤管以
流音嗚呼哀哉

肅宗大宣孝皇帝哀冊文

裴士淹

維寶應元年歲次壬寅四月庚戌朔十八日丁卯大
行文明武德大聖大宣孝皇帝崩於長生殿旋殯於
兩儀殿之西階粵二年三月二十七日庚午將遷座
於建陵禮也燭列瑤宮河低象闕簷擁霄霧庭微曙
月森鷺翮以成行儼輶輅而將發哀子嗣皇帝諱克
窮感慕躡踊傷摧奠玄辰而增肅瞻白雲而不迴雨
泗噎兮千官泣天仗搖兮萬國陪懿業方永神暉潛
翳迺詔有司騰芳後裔其詞曰

高丘演慶玄牝開祥寶曆攸重靈源自長文昭武穆
累聖重光七葉增睿時惟我皇天帝褰裳金真養正
宵然姑射欽哉有命謂禹知子踵堯傳聖伊昔休應
虹流電驚猗蘭養德叢桂疏榮狗齊純孝弘裕欽明
光含玉理秀發珠衡辨日多悟朝雲更輕尊師樂業
問寢揚名三善克舉萬邦以貞叶契斷金觀書羣玉
性與兼愛道存濡足詢事考言登庸受籙運符提象
輝同偶燭景星耀芒大風成曲戎錫緣間書稱猾夏
轉旆秦川連兵朔野水靈潛衛山祗醜嘏順時徙邑
聿來岐下用翦修虵匪勤戎馬輯寧黎庶保乂宗社

赫矣天府於皇樂都瑤壇饗帝璧沼崇儒進善求瘼
明刑恤辜丹巖藏銑綠浦捐珠容成啓路王母獻圖
功宣祀夏道洽歌虞物莫疵癘人用招蘇櫟陽先惠
棣華增睦冠帶麟洲賓廷鳥服招諫懸鼓誓師推轂
禮備樂和遠安邇肅恩猶覆燾義涵亭毒露臺愛費
茅宇蠲奢北薦春寶南收蒼華卿雲聳蓋滴露垂葩
醜秀同穎階榮指邪滌慮高居凝神下濟遠探仙訣
深入真諦穆穆頌聲温温愷悌榮鍾三古牢籠八裔
才生之疊爰集良已之文莫繼佇襄野而來巡怨祁
宮而興沴嗚呼哀哉序分弘璧庭臨綬衣如天落構

象日徂輝棄璇宇而奚速啓金滕而遂違鳥冊龍圖
之瑞青丘丹浦之威瞻脫屣今如在痛攀髯今不歸
巖岫晦今愁雲積郊原空今落景微嗚呼哀哉環瀛
縞素鞮譯凝慕龜謀協吉象耕遐赴珠玉重而不藏
襲稱廉而有數靜鉤陳於塋所閉閭闔於應路靡營
南紀之塵空望西陵之樹嗚呼哀哉蒼旻浩然緹律
亟遷旣深悲於寒霰俄隕涕於韶煙背鳳城而紆鬱
援蜃紉而聯翩息輿駕於懸圃聞鐘磬於廣川神理
冥其造物皇情邈以終天嗚呼哀哉三光猶變九丹
非術蛩隧蒼茫鮒隅蕭瑟度清渭而徐轉指甘泉而
半出薤曲嘶管以臨風松門倚巖而蔽日嗚呼哀哉
式敷末命戒茲羣后至德神功天長地久邁千祀之
騰茂居百王之冠首俾下武而欽承彰典暮而不朽
嗚呼哀哉

恭擬 世宗肅皇帝哀文

皇甫汈

維嘉靖四十五年歲次丙寅十二月丁亥朔十四日
庚子 大行皇帝崩於萬壽宮旋殯於白虎殿越歲
丁卯三月十七日壬申將遷座於 永陵禮也雕輜
移輜畫攢撤帟風咽酸笳霜凝悽紉 嗣皇帝心隨

去劍目送遺弓昊天高而悵罔極泉路渺而悲奚窮
小臣泐念昔巳丑賜策彤庭分符赤縣猥授華銓載
司清憲罪荷曲矜恩蒙微譴敬昉冊命恭述哀辭少
報君臣之義仰宣父子之私其詞曰
惟明應運蕩胡妖氛還資華曆誕挺 聖君 高帝
崛起恢烈鏖勲么麼驅除曷足以云 列聖續服克
邁徽猷七葉中否八駿荒遊闡瑾構豐藩濠逞謀治
垂端冕殆隣委表懿問惟興光昭伊昔善埒東平仁
歸西伯妣母樂推啓賢師錫嘉靖殷邦修功代邑祇
命允協格來其勤踵堯蹈舜稽古禮文創建九廟懷

柔百神享祀咸秩燔瘞攸分爰覃孝思金弘德教敬
一垂箴農桑屢詔宣后崇儒軒皇問道精意執中玄
心觀妙雪由欵集雨以祈零甘露嘉醴卿雲景星和
藜六穗芝草五莖恬鱗物沼肉角儀庭皓質緇章黃
耀赭異胡瑞不臻胡休不畀化浹中區聲漸遐裔象
德象功盡倫盡制軼漠航琛踰沙匪費百蠻解辯四
夷削衽禮樂可興干戈底定秦漢以還唐虞斯盛登
必元愷簡必俊髦穆穆布列濟濟盈朝於淵網致在
數旌招內寧外輯陽長陰消方祇表靈高禱恤胤始
正中闈旁充燕寢粉黛蘭郁禕禴暈映魚貫承私麟

祥衍慶既咨四岳亦闢四門躬閱封事洞察邇言威以克愛義以割恩剛斷惟獨權攬則尊匪窮土木麗軌宏圖匪慕蓬瀛嗇神葆軀璇題瑤榜綺綴椒塗飛廉望氣阿陞凌虛嗟金藥之未就對瓊蕊之無徵巨跡空履仙掌徒擎宮車晏出辰几宵憑居諸急節霜露頽齡嗚呼哀哉小臣游昔也通園陵以馳道今望履綦而苔沒向也扈清蹕於屬車茲奉衣冠而月出採松栢於江南樹成拱而風瑟別灞滄以爲池遡浙川而流泣嗚呼哀哉探大隧之寂寂今預鴻筭於睿營瞻豐丘之冥冥今協龜筮以考貞攀龍髯兮百工

躡踊封馬鬣兮萬姓悲嗚嗚呼哀哉若帝者父作於前子述於後日照月臨天高地厚刊德難名垂聲不朽從七聖以皆迷慰一人於在疚嗚呼哀哉

襄莊王哀辭

并序

汪道昆

余守襄 襄莊王獨親守有加禮後十年余至莊王業已棄國人余問園陵去國門百里而近余居楚習爲之歌楚以哀之其詞曰

思皇 先后起郢中些瞻茲近屬茂乃庸些明明嗣服睦周宗些荃胡不居譽命同些繫昔獻王胙赤土

些敬共不貳方于魯些維王中興及踵武些綿綿世
祀保昌阜些荃胡不居享純嘏些峩峩王噐亶幼清
些胡然而金胡然而玉儼容聲些維仲若季淑且鈞
些荃胡不居翼有成些相彼後宮邦之媛些紘緹締
裕躬爲儉些周南樛木無違怨些荃胡不居尚婉孌
些宗公有事序本支些藝蕭執鬯迨皇尸些優然在
位如見之些荃胡不居燕歲時些漢水方城亘千里
些丞丞有衆何可勝齒些巷歌里相輟勿起些於戲
不忘不啻若其考妣些荃胡不居爲民紀些故宮岌
業鬱雲興些高堂七仞城且平些方連交綺列丹楹

些洞房阿閣藉重廼些荃胡不居四體寧些東壁西
崑壯以麗些長筵曲宴禮樂備些四坐行觴歌旣醉
些荃胡不居王高會些章華授簡盛文章些厥有宋
玉獨擅場些仲宣鄴下當鴈行些杜陸奕業揚芬芳
些民歌出牧臨高陽些落日倒載甘楚狂些此皆蟬
蛻何有鄉些荃胡不居相翱翔些高唐之上朝雲羃
些粲粲天人艷初日些輕裾文履紛來集些便娟綽
約麗以則些荃胡不居友琴瑟些翩翩漢浦翔二妃
些英英結佩光陸離些若遠若近揚蛾眉些荃胡不
居引令儀些三緇七澤下秋潦些沅芷澧蘭富芳草

些荃胡不居可終老些陽阿激楚歌雜陳些倡以白雪和陽春些流商刻羽妙入神些荃胡不居聽其真些大椿有秋菌無昔些終古同歸彭殤匹些洵美有子其儀壹些人貌榮名永無射些王公有土可用式些亂曰靈之來兮夷猶乘白雲兮驅蓐收靈之去兮阻修扈太一兮總九州懷故宇兮蒿目著遺愛兮千秋

哀梁有譽文 并序

王世貞

嘉靖甲寅孟冬友人梁有譽以疾卒於南海明年乙

卯春訃至自南海故善有譽者武昌吳國倫廣陵宗臣吳郡王世貞相與爲位哭泣燕邸中又走書西南報李攀龍徐中行哭如三人又十月而友人戶部郎張佳胤奉輜粵中國倫等廼寓椒絮而南爲文授張生使告於梁氏之喪其辭曰

夫何一媿人兮掩姱修而弗揚白雲蒸於菌桂兮靈風歛乎椒芳躡大羅之崔嵬兮九曜布而頡頏鰲波泱泱以崩騰兮擷珊瑚於扶桑羗幼清而恬志兮疇牯荃之素都足次且於帝閨兮目渺渺其焉愉羲輪晚晚而垂墮兮愴沉淪於世模守金虎之故臺兮載

籍汎瀾而自娛妖狐綏綏而戴首兮變諺婧之崇飾
蘇糞壤而焚之兮嗅郁郁其流馥幻槁礫爲璿瑰兮
宮期荃乎游息外幽貞而窈窕兮蠱蟬緩其曷以極
獨飄然而內捐兮曾不邁乎厲淫佩迷穀之璀璨兮
修途炯乎叢林招南州使介兮穎川授荃之夙襟驕
龍飲而驤首兮神驥躡步乎焦岑竭陳辭以九誓兮
指北斗而明心軟沆漑之涓波兮曰吾黨自六合仰
割太乙之緒兮俯窺乎玄微之窟渺大椿於一瞬兮
縮廣輪而咫尺河嶽寄荃之輔兮星離離灼乎眉色
荃又薄夫天澤兮甘此伏莽朝容齋於承明兮夕結

幘乎神武酌濛雲之油油兮逝鬱術而不返顧句曲
奮而精飛兮葯房風而自吐鑿混沌而竅之兮羣真
紛其上訴彼荃亦何爲兮辱陸吾使不得王帝憮然
而中剛兮詔徵荃乎下土絳旄風兮珠綃雨鹿軒莪
兮歸帝所擢毛骨之澠忍兮咀清冷以爲糗玉女侍
按更後先兮金童掌節而猖狎鞭恂恂之綠耳兮駕
虛無之沙棠疑托跡於皓羽兮唳玄夜之廩霜睨大
匡之塵墟兮庶幾念故侶而來翔亂曰微儀綿邈令
言爍兮頽魄不留徑千秋兮泉臺漫漫亦旣旦兮白
日京京衆趣冥兮

續文選卷第二十九終

續文選卷第三十

明平原湯紹祖公孟撰

碑

招真館碑銘

梁簡文帝

玉龜一始金書八會道浹地心功浮天外故帝可小
惟貞能大德起同塵善生塞允保物自自然人符交泰
掩映綠蘿穹隆紫蓋仙治之美此焉爲最雄柱千步
陽臺百丈水均下矚山踰高掌野寂雲興禽繁山響
升虹夕栖豐雷朝上書藏玉柙藥蘊銀筒燒鉛雜鯉

續文選 卷三十一
折桂和葱芥柯雖朽碎石無窮

許長史舊館壇碑銘

陶弘景

渾樞驚氣方祇吐靈依性分境傳識賦形化通八寓
功浹四溟巡跡電滅測體淵停旋區岳立巨海雲舒
搏風泳水蹠實憑虛亦有幽匠開石架廬情高身遠
天府地居榮巒巴曲畫壤腴浮五闡面啓九涂環周
長隰旁嶺交汧比流乃稱龍伏寔謂金丘昔在西漢
三茅來賓爰暨東晉二許懷真裁基浚井栖道接神
允膺輔聖錫茲侍宸參差年代細縕名氏書誥具宣

精華未彌甄甃將淪沉階已毀拱樹霜摧修庭草萎
肇館華陽歲躔二紀永觀前猷聿遵洪軌帝曰懋哉
爾焉斯止經之營之輪乎負矣勝殿密響瀉甌揚芬
瑤宮碧簡絢采垂文璫由玉檢綺幕綉巾蘭缸烈耀
金爐揚熏桐柏雙教方諸兼學僉證心清俱漏身濁
離有離無且華且朴結號虛皇筌法正覺藥徵質瑩
禪感慧通飛行歛悅捫景帶虹振苦排郵還明返聰
物言是力我見無功紛紛千古汗漫兩儀三相幻惑
舟壑自移緣來則應不慮不爲式題龜錄人天鑒知
司空徐州刺史侯安都德政碑文 并序

徐陵

巖巖天柱大矣周山之峰桓桓地軸壯哉崑崙之阜
三光懸而不墜九土鎮以無疆承乾合德之君則天
體元之后所以金谷四鎮咸建五臣業配蒼祗功成
寓縣至於流名雅頌著美風詩年代悠然寂寥無紀
其能繼茲歌詠者司空侯使君乎自文韶武穆祚土
開家灑水盛其衣簪榮波分其緒秩仁義之道夷門
美於大梁儒雅之風司徒重於強漢自通人許劭託
命於江湖高士袁忠寄身於交越俱違建安之難獨
處衡山之陽祖天資秀傑世載雄豪卓富擬於公侯

班佃必於旌鼓父光祿大夫邑里開通德之門州鄉
無抗禮之客自茫茫禹跡赫赫宗周家滅驪戎國以
夷羿我高祖武皇帝迎河圖於浪泊括地象於炎洲
南興涿鹿之師北問共工之罪天生宰輔堯年致白
虎之祥神賜英賢殷帝感蒼龍之傑公亦觀時佇聖
嘯咤風雲跪開黃石之書高詠玄池之野沉吟梁甫
自比管仲之才惆悵華郊久負伊生之歎自錫虜侵
華羣蠻縱軼後臯桂部之地四戰五達之郊郡境賢
豪將謀禦難長者僉論推公主盟義士雄民星羅霧
集公旣膺五聘方啓六韜率是驍徒仍開嶺嶠自大

續文選 卷三十一
三
不貴堂
討瀟湘同滋樊鄴下軍違命上策不宣敗我王師受
拘勅盜大陳格於文祖咸秩具神率土依風羣靈稟
朔公亦忠爲令德天纂之謀吳帳斯開衛門無擁雖
復季孫還魯隨武濟河國慶民歡相儔匪若卽授使
持節開府儀同三司丹陽尹昔光武不允於馮異穆
公深禮於孟明終報王官之師遂舉咸池之地斯乃
聖主之宏略而名臣之遠圖者焉皇帝以陶唐啓國
致玉版於河宗顓頊承家佐金天於江水經綸草昧
定鼎之業居多締構權輿斷鼇之功相半固以英聲
馳於海外信義感於寰中主器攸歸當璧斯在公於

是抗表長信清宮未央從億兆以同心引公卿而定
策馳輕軒於軫轡奉待駕於中都七廟之基於焉永
固萬邦之本由此克寧乃授司空公南徐州刺史於
是鎮之以清靜安之以惠和望杏敦耕瞻蒲勸穡室
歌千耦家喜萬鍾陌上成陰桑中可詠春鷓始嘯必
具籠筐秋蟀載吟竟鳴機杼或肅拜靈祀躬瞻舞雩
去駕擁於風塵還旌阻於飄沐京坻歲積非勞楚堰
之泉倉廩年豐無用秦渠之水雖復東過小縣夏雨
逐其輕輪南渡滄江秋濤弭其張蓋固不得同年而
語矣若夫聽採民訟昏曉必通召引軒櫺躬親辯決

立受符於前案無留詣於後曹接務高城之中非異
甘棠之下欣欣美俗濟濟都塵以賈琮郭賀之風行
建武永平之化於是州民散騎常侍王瑒等拜表宮
闕請揚茲美化樹被高碑民欲天從允彰綵誥銘曰
鬱鬱三象茫茫九州綿天慘沴地虔劉赫矣高祖
爰清國讐元勳佐命力牧風侯亦旣旋歸邦家有暉
宮亭蠡浦奮翅高飛雷卷勅寇風行國威文身披髮
作貢來綏我皇纂武攀號東序謁渭同周迎門惟呂
流矢爲暴攬槍斯舉喋喋蒼黎危危刀俎自我徂征
妖氛克平爰驅大彘實剪長鯨北震巢浦南俘灌城

青羗卷介赤狄迴兵蹈舞難踰歌謠靡宣曰我黎庶
俱祈上玄山移兩越海變三田公爲上相復倍斯年

四瀆祠碑銘

王褒

靈祠岳立貝闕雲浮寂寥詭怪髣髴神遊姬嬴分國
河渭合流桃花春水靈草孤洲潼鄉河曲汾陰睢壤
亂流不度龍門難上河魚送迎江妃來往水開通跡
山臨高掌知以藏往神以知來榮光離合雲氣徘徊
水仙遺操津吏餘杯波息川后浪靖澹臺

陝州弘農郡五張寺經藏碑文

并序

庾信

蓋聞如來說法萬萬恒沙菩薩轉輪生生世界豈特
優波提舍祇夜修多而已哉是以熙連禪河質多羅
樹七處八會三清四說皮紙骨筆木葉山花象負之
所未勝龍藏之所不盡雖復銀函東度金疊南翻秦
景遙傳竺蘭私記譬猶得海水之一珠不下崑山之
片玉若夫人雲深藏師子雷音梵志往生聲聞說戒
雪山羅漢之論鷲嶺菩提之法本無極際何可勝言
弘農五張寺者南陽張元高寓居此地昔者千金之
族見徙五陵大姓之民移家六郡蓋其流也元高五

子負荷遺訓離經辨志金是成名入室生光咸能顯
德加以尊承慧業敬受法門兄弟同居共捨爲寺伽
藍肇建卽以五張爲名是知城居趙信仍名趙信之
城殿入蕭何卽號蕭何之殿加以象馬無恡衣表是
捨春園柳路變入禪林蠶月桑津迴成定水平輿雖
盛豈可獨擅二龍扶風最良不得專稱五馬寺王三
藏大法師法映邑王洛州刺史張隆等財法行壇身
心罄竭兼化鄉邑道俗數千敬造一功德輪見成三
百餘部
雲書金繩金檢削蒸粟之簡裝酸棗之
珠金入香城咸封禪閣坐堂伏檻羗非湘水之神綠

續文選 卷三十一
房紫的足擬恭王之殿高掌西望長河北臨鼎氣常
浮爐烟咸起戶牖寥廓吹萬龍門之風梁棟崢嶸落
實河源之樹僧徒雲集不遠燉煌之城學侶相奔更
合華陰之市兩陝昔分實基王化二陵今阻翻馳羽
檄虞公屈產交亂風塵召伯甘棠凋零霜露雖復兼
能共治未遣渡河之獸烽析是警實擾移關之民是
以法王御世天人論道汲引四流周圓五怖故能調
伏怨憎消除結縛法水津梁得無砥柱之難香山轍
迹非復終南之險天子命我試守此邦墨竈未黔孔
席無暖纔臨都尉之境卽有樓船之役旣而南風不

競北道言旋幕府旣開邦君且止鄉俗耆老依然此
別屬茲法事須余制文聊以課虛爲銘云爾

舍衛之國祇洹之園三明極地八會窮源連河競說
勝辯爭論波提東度祇夜南翻非空卽色離有無言
達人止是獨悟重昏身雖繫馬心避騰猿禪樓却月
義殿翔鷗迴風香蓋反露珠幡西臨砥柱東背輶輶
河鳴陽硤山嚮蘇門翔禽歌嘯流澗絃喧度河餘獸
移關舊村昔爲畿服今成塞垣城疑廣武地似樓煩
燿烽金照象馬單奔無鍾襲莒有雨圍原不資十方
誰釋三怨風傾地柱火及天元銀鉤永固金牒長存

續文選 卷三十一 希貴堂
封君馬首方事南蕃言從楊僕請謝劉昆

周上柱國齊王憲神道碑文 并序

庾信

昔者軒皇受姓十有四人周室先封十有五國自爾承基纂胄保姓受氏雖復千年一聖終是百世同宗故知昔之東京既稱大漢再受今之周曆卽是鄴都中興公諱憲字毗賀突恒州武川人也晉太康之世據有黃龍魏孝昌之初奄荒玄菟太祖以百二諸侯三分天下函谷先登鴻溝大定功業如此人臣以終公含章天挺命世誕生降太一之神下文昌之宿珠

角擅奇山庭表德儀範清冷風神軒舉聳動廊廟光華朝闕未逾韶齒已議論天下事人或曰是謂若木一枝旁蔭數國長河一直自然千里風颺欲遠光景將昇後魏二年封涪城縣開國公時年五歲也虹蜺滿野是廢當塗之高鸞鷲鳴岐實始維新之命國家光宅受圖欽明秉曆大風初卷長沙始封周元年進爵安城郡公食邑二千戶仍授使持節驃騎大將軍開府儀同三司開府同於馬駿秩擬六卿驃騎等於劉蒼位高三事宗子維城彼多慙色武成二年授使持節大將軍都督益寧巴瀘等二十四州諸軍事益

州刺史改封齊國公食邑萬戶公時年十有六王武
子以上將開府未滿立年荀中郎爲十州都督才踰
弱冠方之於公已爲老矣加復營丘負海齊桓公受
賑之城岷山導江漢武帝求仙之地自非名陵孤竹
聲振沈黎豈得南至穆陵西登積石幸無白虎之患
寧待黃龍之盟邛笮畏威微盧仰德生爲立廟刻石
頌功成都有文翁之祀非謂生前漢陽有諸葛之碑
止論身後比之今日豈可同年而語哉保定四年與
大司馬蜀國公圍金墉城師臨洛浦則廣武營奔兵
上邳山則河橋路斷八川風俗五方名利鐵市銅街

風飛塵起天和元年徵還行雍牧公以日月之明威
神其政漆沮旣從荆岐卽又少陽用事路不喘牛仲
秋以殷民無驚犬二年拜大司馬仍理小冢宰營室
殿軍噐太監天官以邦國爲基是司六典夏官以兵
戈爲主專謀七德是以噐械填委旣包吳漢之功宮
殿崢嶸彌伏蕭何之法時以白露涼風務閑農隙督
兵三萬出自宜陽拔伏龍之城平姚萇之壘馬陵削
樹魏將路窮平陰聽烏齊師其遁天子冢弟禮絕羣
公仁義所往事資道德建德元年進爵爲王仍拜大
冢宰姬旦封於曲阜不廢居中劉交國於彭陽無妨

續文選 卷三十一
常從豈直周召二南金居師傅晉鄭兩國俱爲卿士
而已哉匈奴突於武川燿火通於灞上公述職巡御
治兵朔方馬邑星飛龍城月動挽留犁之酒經略不
前失焉支之山下馬而去東隣逆命反道敗德囚箕
子於寒庫羈文王於王門天子將有盟津之師召公
獨議公報以誕膺天命克成厥勳昔者秦昭起師於
蜀直問張儀晉武用兵於吳惟謀羊祜於是中軍無
帥僉曰有歸五年拜上柱國元戎東討給王鐵錡二
萬先襲太原斗建麾兵天離轉戰虎嘯風騰雲飛電
掩林胡棗栗詎得充饑晉陽荻蒿何能拒防又加王

精兵六萬長圍晉州然後六軍星陳萬騎雷動中權
始及前茅已戰自爾卽爲前鋒橫行入鄴觀彼車絙
槐木馬驚旋濘積甲高昆陽之城尸封塞富平之水
莫不如彼建瓴同斯破竹一朝指揮六合大定是用
光昭下武翼亮中都足以攄祖宗之宿憤解生民之
怨黷方當待彼石閭部斯玉鼓經緯天地光華日月
旣而赤烏夾日黃熊入寢實沈無祀桑林不祭宣政
元年六月二十八日薨春秋三十有四季友之亾魯
可知矣齊喪子雅姜其危哉公噐宇淹曠風神透遠
璣鏡照臨山河容納置罇待酌懸鐘聽扣聲動天下

光照四隣武皇帝以介弟懿親特垂友愛而密謀竒策加禮敬焉常謂左右曰孔子云自吾有回門人日親其齊王之謂也用之作宰則萬方協和用之撫軍則四表懾伏豈直臯陶爲士國無不仁隨會爲卿民無羣盜愛翫書籍敦崇禮樂管絃入耳則溪谷俱調文雅沿心則煙霞並韻養由百發落鴈吟猿應奉五行綈緇縹帙雍容舉止抑揚談論當世以爲楷模縉紳以爲軌範少有壯志頗校兵書玄水降靈穀城授策飛風長柳月角星眉莫不吟誦在心撰成於手所著兵法凡有五卷六韜九法不用吳起舊書三令五

申無勞孫武先誠可謂有忠孝焉有壯武焉不自驕矜謙光下物宋人獻玉不貪爲寶伯成子高守仁爲富不謂以信致欺爲善非樂天年不享嗚呼哀哉以某年月日塋於石安縣洪瀆川之里原隰悽愴埋於盛德幾年丘陵搖落蘊于才良永矣乃爲銘曰

悠哉朔方逖矣窮陰山連鳥道地盡龜林重黎業大伯翳功深胄其積德必有君臨太祖撥亂喪君有君功迴地軸策動天文猶臨赤水尚復黃雲諸侯八百天下三分公之挺生寔惟天假翠微神降文昌星下照於四國充於兩社舟楫江河棟梁華夏水通詞鋒

風飛文雅純深之性地極天經忠貞之道事感百靈
君親惟一臣子惟寧忠泉出井孝笋生庭乃宰天官
爲國之輔是居上將爲天之柱乃聖乃神惟文惟武
策高開闢威移雲雨九宮神略三術謨明天離轉陣
月德廻兵黎陽水駭官渡山驚冀州旣載東原底平
溟波欲運弱木將危中峰岳斷半海鵬垂鳳沉丹穴
龍亾黑陂臨淄廢市東武山移千齡萬古英聲在斯

周大將軍司馬裔碑文

并序

庾信

公諱裔字遵胤河南温人也昔顓頊之命始則南正

司天重黎之後又以羲和掌曆夏陽適晉得隨會而
同奔東海避秦與毛公而俱隱其後金行受命玉笥
南遷帝系極於輿圖中朝至於江表曾祖楚之晉太
傅錄尚書揚州牧會稽文孝王之次子元顯之幼弟
也元顯見害之後栢玄篡逆之初爰自齧齒客身屠
釣河內道左抱劔長號代郡城前慟悲靈祭江淮志
節之士汝穎風塵之客感激一言咸多依附旣而雲
生伏龜星出鯨魚太白經天蚩尤映野公乃收合餘
燼泣血登俾臨武牢之關據成臯之坂擁衆萬家歸
於魏室魏明元皇帝遙授平南大將軍荊州刺史襲

封瑯琊郡王尚河內公主命王承制從賓國之儀於
時宋兵憑陵旗鼓侵逼虎牢不封金墉無援魏太武
皇帝授王使持節侍中安南大將軍開府儀同三司
給前後部鼓吹元戎啓行志雪冤耻登壇慷慨三軍
掩泣黃河漕粟已出石門仕馬連旗將臨野坂旣而
雲中柝起代郡烽燃反旆南轅途窮北略贈征西大
將軍都督梁益秦寧荆兗青豫郢洛十州諸軍事揚
州牧司徒謚貞王祖金龍封瑯琊鎮西大將軍儀同
三司吏部尚書贈司空謚康王父悅鎮南將軍豫州
刺史漁陽莊侯以荆河刺舉時值亂離疊起蕭牆遂

終非命公遺腹載誕流離寇途複壁襁負深山擁樹
程嬰之匿趙武從役家臣王成之藏李燮爲傭酒市
遭太夫人憂苦草墳塋以終灰燧形骸毀瘠踰於喪
禮年十有五始幹家事楹前鑿柱卽取遺書石上開
松仍求故劔出身司徒府叅軍除中堅將軍員外散
騎常侍值魏室多難所在蜂起孟津以北無復封畿
嵩山以南卽爲鋒鏑公建議修武立柵溫城函谷西
封河橋北斷長亭籍馬並入武城百里租車咸輸溫
縣太祖文帝締構關都經綸夷阻招携以禮懷遠以
德馬文淵之擇主去隴坻而歸身竇周公之入朝在

河西而奉詔大統七年蒙授平東將軍北徐州刺史
十年河內故義四千餘家願立忠誠須公衣錦乃授
使持節領河內太守加前將軍懷州拓境兩鎮奔波
柳泉轉戰三城授首十三年太祖召山東諸立義之
將能率衆入關者有加重賞公率先而至領戶千室
卽以爲封固辭不受其菽粟之賜或以指困馬牛之
賞將同量谷朝廷以華陽西極漢水東流歎孟達之
奔兵怪劉封之失策魏前元年移鎮漢中除白馬城
王領華陽郡守昔稱導漾今聞上瀦煙沉火井雨歇
雲門其年授大都督加散騎常侍柱國蜀國公開金

牛之道通牧馬之關公捲甲北塞懸車束馬遂得策
預葭萌勳叅綿竹封龍門縣開國子蒲州刺史仍領
新州尋授使持節車騎大將軍儀同三司大中正隆
周授圖天保大定以公才望仍爲舊臣遂乃義深追
遠恩隆繼絕卽改封瑯琊縣公邑五百戶仍遷驃騎
大將軍開府儀同三司都督巴州諸軍事巴州刺史
武成二年被勅赴援信州魚復道阻屢却岑彭荆門
水急幾沉吳漢公乃月峽先登瞿唐直上天子以公
操履忠勤儀刑亮直乃徵爲大御伯尋轉大御正邑
一千一百戶樞機近侍出納綵言所謂多識舊章殿

中無雙者矣四年大軍東討公所領義衆先守枳關
授都督懷州諸軍事懷州刺史偃師張幕河陽牧馬
雖接戰於富平已連營於官渡五年詔追還拜始州
刺史更封信州賊山彰尋寶渝恃險峽路五尺緝釣
纜通縣水三門橋飛齊渡旣而風行草偃谷靜山空
前後平十一城獲九千餘口馬歸平樂金輸水衡天
保二年除信州刺史都督信州諸軍事朝發白帝暮
宿江陵氣振巴丘之兵威警建平之戍五年遷潼州
刺史益州柱國公降帝子之重鎮天井之星延閣擬
於叢臺岷山方於代那公仰稟雄謨參謀遠略故得

身預舞陽之功位極長平之寵六年授使持節大將
軍大都督西寧州諸軍事西寧州刺史方欲關沫若
徼狎牂見夜郎之候習昆彌之戰而飛鳶墮水馬援
去而無歸金馬騁光王褒行而不反嗚呼哀哉七年
正月十日薨春秋六十有五詔贈使持節大將軍懷
邵 汾晉四州諸軍事懷州刺史夫人襄城公主魏
獻帝之曾孫趙穆王之季女王姬蕭恭禴翟禮典四
教兢莊三星今淑有光隆慮之賢足表平陽之盛生
則從夫以秩歿則同穴以禮建德元年八月十二日
合葬於武功三時原大夫墓樹以栢諸侯墳高於雉

吁嗟滕公來居此里詔謚定公禮也公資忠履孝蘊
義懷仁直幹千尋澄波萬頃逢蒙射法力牧兵書星
辰高下之占風雨逢迎之氣故得師出以律天幸將
軍者也至如官曹案牘未常煩壅戎馬交馳不妨餘
裕足使四岳彌峻三台更明在朝四十一年身經一
百餘戰凡任四郡歷八州未嘗以貨殖經懷去如始
至渭南千畝之竹更懼盈滿池陽二頃之田常思止
足身沒之日家無餘財素車白馬狹室崎嶇黃腸玄
甲皆庭仄陋有詔冬官爲營寢室朱邑祭酹無所漢
后是以賜金陳表妻子露立吳王爲之開館嗚呼哀

哉世子侃孝家忠國揚名顯親是以勒此豐碑懼從
陵谷植之松柏不忍凋枯銘曰

欽若曆象平秩寅賓少梁奔華地入咸秦族夷興馬
書窮獲麟玉鏡云始金行乃構象浦通關龍沙開候
上糝石起河陽水鬪五馬南浮三星東宿大傳作牧
奄有江沱司徒避亂承制荆河南勞推轂猶思枕戈
龍媒被野蒼兕凌波莊侯季年禍機相接誕公遺嗣
崎嶇懷挾山竄趙武家藏李燮伍員道阻燕丹路遙
南奔楚塞北避秦橋水流登隴寒風度遼有功都護
則重嫖姚懷書上馬習禮從戎陣圖六甲兵占八風

藏松寶劔射柳凋弓推誠賈復屈節廉公八翼頻飛
六條亟秉勇此仁義行茲寬猛持印山開沉黎盜靜
取甲無丘均田不井懋功賜爵上將賞官軍中受詔
塞外登壇方屠叅合更鑿臯蘭渝川毒水燠道災氛
地亾都尉灘悲使君谷寒無日山空足雲北風吹旄
秋霖泣軍遣奠雙設銘旌兩布泌水同墳平陽合墓
悲哀嗣子攀號靡訴慟甚風枝悲深霜露自此何世
從斯幾年麒麟欲鬪華表中燃地形樓起松心蓋圓
茫茫丘壠代代英賢

周車騎將軍賀婁公碑文

并序

庾信

昔者軒丘命氏初分兄弟之姓若水降居始建諸侯
之國自是以官爲族因地爲宗水泝枝分其可知矣
公諱慈字元達本姓張清河東武城人也仕於周張
仲爲孝友謀於晉張彥爲賢臣韓有開地則五世強
國趙有孟談則三卿不戰祖慶少習邊將憑仗智勇
雖復五車竹簡不取博士之名一卷兵書卽以將軍
自許角端在手必無齊魯之侵蓮花插腰甚得蛟龍
之氣爲車騎大將軍儀同三司散騎常侍霸城縣開
國伯贈河州刺史父粲公子公孫有鎡基於天下良

系不遺 卷三十一
弓良治有世業於家風書則百家可知劍則千人可
敵三槐以鶩鼎象物知其神姦五等以桓珪班瑞守
其宮室君以才望兼而有之終於使持節車騎大將
軍儀同三司散騎常侍武定縣開國公贈河州刺史
惟公乘山岳之靈受星辰之氣年在髫髻甫就勝衣
竹馬來迎已知名於郭伋羊車在道卽見賞於王澄
豈直童子明經書生說卦而已至如禪河清論秋水
高談故以辯析龜林聲馳鹿野國家官族君爲首姓
起家車騎大將軍儀同三司襲爵爲公增邑合一千
六百戶弱冠登朝傳呼甚寵漢魏台鼎故無此比中

朝方伯罕有其年大冢宰任總機衡是勤王略惜君
忠壯委以爪牙乃領左廂親信出爲梁州防主華陽
西極漢水東流巴濮旣寧沉黎卽靜保定四年王師
北伐以君驍勇被召將兵師下宜陽身登函谷將燒
白馬之城以覆烏巢之壘旣而中途甚雨未獲圍原
軍師聞喪不成侵宋柱國趙王今上之第九弟也文
則河間上書武則任城置陣作鎮岷丘揚旆錦水白
虎之俗難安黃龍之盟不定以君智略入佐中權天
和元年授使持節大都督治柱國總府司錄仍轉司
馬餘官封如故相如西喻鏤石於靈山武侯南征浮

船于瀘水方之今日彼獨何人九品課工爲上之下
四年入朝歸事宰旅卽受載師大夫將命齊國尋盟
出境卽用和隣之儀入國聞喪仍從會葬之禮可使
南面此之謂乎尋以本官入治軍正至如渭水兵書
在心爲志軒丘陣法聚石成圖旣得師不疲勞兵無
怨讟入陪中禁更領儀同邸客城池門闌戶籍咸資
巡警金用司存帝城近臣公室密戚如逢司隸似畏
都官旣而孤城鄭姬不相其年巴水深翁不醫其疾
春秋三十有三奄捐官舍呂子明之疾甚歎軫吳王
阮元瑜之長逝悲深魏主有詔贈某官禮也以建德

四年三月日歸葬於河州苑川郡之禁山公六郡良
家西河鼎族地壯金行人雄塞氣兵書七卷河水浮
來射法三篇天弧夜下鋒旗不息刁斗恒驚猶得馬
上讀書軍中習禮太史子義善於謀策諸葛公休長
於撫馭四代儀同三司七世河州刺史鍾鼎成列冠
蓋連陰所謂生爲貴臣死爲貴神者也但以遊魂久
客反葬途遠道阻山長妻孤子幼哀聲滿野愁氣連
雲况復松檟飄颻方臨武威之戍丘陵廻遠直對臨
洮之城馬援亾於武溪尸柩返於魏里梁鴻死於會稽
妻子歸於平陵嗚呼哀哉崎嶇遠矣昔者繁昌祠

前卽有黃金之碣德陽墓下猶傳青石之碑是謂勒功乃爲銘曰

七葉佐漢五世相韓忠臣入仕孝友當官青城仙洞黃石祠壇臺堪走馬書足廻鸞武定風颯霸城嚴肅金馳雙傳俱分兩竹重世刺舉連鑣衣服草靡青丘風馳赤谷世不乏賢挺茲上嗣孝有三德忠無二志劍足身挺書堪面試於節旣秉高蟬且珥龜轉印函蛇盤綬笥左右將軍前後常侍繼踵五侯因循三事於旃九坂艫舳雙流還驅木馬更引金牛江波錦落火井星浮蹲酒望帝安歌蜀侯受脈河陽偏師洛浦

署陣成臯連旗廣武朝兵減竈夜營多鼓箭起六麋鋒摧九虎倏忽人世俄然今古崇發兩星鑿驚二豎遊魂通夢言反舊塋紫泥賜冊黃腸贈行途登石紐路入金城寒關樹直秋塞雲平劍埋合柱書藏鑿楹武侯爲廟樂公爲社雲益低臨霓裳紛下碑枕金龜松橫石馬永矣身世畱名華夏

唐故特進贈開府儀同三司揚州大都督南

府君睢陽廟碑

并序

柳宗元

急病讓夷義之先圖國忘死貞之大利合而動乃市

賈之相求恩加而感則報施之常道睢陽所以不階
王命橫絕凶威超千祀而挺生奮百代而特立者也
時惟南公天與拳勇神資機智藝窮百中豪出千人
不遇興詞鬱龐眉之都尉數奇見惜挫援臂之將軍
天寶末寇劇憑陵隳突河華天旋虧斗極之位地圯
積狐狸之穴親賢在庭子駿陳暮以佐命元老用武
夷甫委師而勸進惟公與南陽張公巡高陽許公遠
義氣懸合訐謨大同誓鳩武旅以遏橫潰裂裳而干
里來應左袒而一呼皆至柱厲不知而歿難狼睺見
黜而奔師忠謀朗然萬夫齊力公以推讓且專奮擊

爲馬軍兵馬使出戰則羣校同強入守而百雉齊固
初據雍丘謂非要害將保江淮之臣庶通南北之奏
復拔我義類扼於睢陽前後捕斬要遮凶氣連沮漢
兵已絕守疏勒而彌堅虜騎雖強頓盱眙而不進賊
徒乃棄疾於我悉衆合圍技雖窮於九攻志益專於
三板偪陽懸布之勁汧城鑿穴之奇息意牽羊羞鄭
師之大臨甘心易子鄙宋臣之病告諸侯環顧而莫
救國命阻絕而無歸以有盡之疲人敵無已之強寇
公乃躍馬潰圍馳出萬衆抵賀蘭進明乞師進明乃
張樂侑食以好聘待之公曰弊邑父子相食而君辱

以燕禮獨何心歟乃自噬其指曰噉此足矣遂慟哭而返卽歿孤城首碎秦庭終懵無衣之賦身離楚野徒傷帶劍之辭至德二年十月城陷遇害無傳燹之嘆息有周苛之慷慨聞義能徙果其初心烈士抗詞痛臧洪之同日直臣致憤惜蔡恭於累旬朝廷加贈特進揚州都督定功爲第一等與張氏許氏並立廟睢陽歲時致祭男在緇祿皆受顯秩賜之土田墓刻鮑信之形陵圖龐德之狀納官其子見勾踐之心羽林字孤知孝武之志舉門關於周典徵印綬於漢儀王猷以光寵錫斯備於戲睢陽之事不惟以能歿爲

勇善守爲功所以出奇以耻敵立謹以怒寇俾其專力於東南而去備於西北力專則堅城必陷備去則天討可行是故卽城陷之辰爲剋敵之日世徒知力保於江淮而不知功靖乎醜虜論者或未之思歟公諱霽雲字某范陽人有子曰承嗣七歲爲婺州別駕賜緋魚袋歷施涪二州服忠思考無替負荷懼祠宇久遠德音不形願斲堅石假辭紀美惟公信以許其友剛以固其志仁以殘其肌勇以振其氣忠以摧其敵烈以歿其事出乎內者合於貞行乎外者貫於義是其所以奮百代而超千祀者矣其志不亦宜乎廟

貌斯存碑表攸託洛陽城下思鄉之夢儻來麒麟閣
中卽圖之詞可繼銘曰

貞以圖國義惟急病臨難忘身見危致命漢寵歿事
周崇歿政烈烈南公忠出其性控扼地利奮揚兵柄
東護吳楚西臨周鄭婪婪羣凶害氣彌盛長蛇封豕
踊躍不定屹彼睢陽制其要領橫潰不流疾風斯勁
梯衝外舞缶穴中偵鈴馬非艱析骸猶競浩浩烈士
不聞濟師兵食殲焉守逾三時公奮其勇單車載馳
投軀無告噬指而歸力窮就執猶抗其辭圭璧可碎
堅貞不虧寇力東盡凶威西慙孤城旣拔渠魁受戮

雷霆之誅由我而速巢穴之固由我而覆江漢淮湖
羣生咸育倬焉勲烈孰與齊躅天子震悼陟是元功
旌褒有加命秩斯崇位尊九牧禮視三公建茲祠宇
式是形容牲牢伊碩黍稷伊豐虔虔孝嗣望慕無窮
刊碑河滸萬古英風

明故翰林院侍讀學士掌南京翰林院事奉

訓大夫華公墓碑

并序

王世貞

公諱察字子潛常之無錫人也葆胄殷宗錫胤公族
其在春秋右師表君臣之訓迨乎晉季孝子艱不娶

之貞乃後仲息遂昌厥裔宋氏之始肇基東亭及明
播遷於蕩口世秬黍稷爰有資橐公父奉政府君息
轅素封解褐半刺業慕文事耻以訾顯 泰陵委和
之運震澤靈秀之滙時惟慶門乃篤生公公生而髫
秀長不膚立攬玉塵以齊潤客訝寧馨挹銀海之滄
澄人誇阿堵誦收三餘之晷論窮九師之辨府君乃
延耆碩以攻玉購英哲而斷金公毫不停綴鋒無抗
衡薄游賢關則林宗之首八俊高步秬苑則田巴之
屈千人屬龍飛之紀元歌鹿鳴而登薦江左之珠競
靈蛇誰當照乘燕中之金收蹠蹠誤蹶追風驚取一

鳴獻無再別竟登南宮上第射策金馬讀書中秘每
試與吳郡陸君浚明更擅甲乙故太保費文憲公讀
其文而歎曰東南之美盡在是乎公遂與陸君申友
于之分錢通則管鮑慚分氣投則逃琨讓舞九畹齊
秀居然大國之香連城金輝宛爾清廟之噐然而珍
阻投夜產忌當門枚馬之吹嗟甫上絳灌之詆訶先
入陸既改省夕拜公亦出郎民部淮漕之舳艫飛雪
義絕染指神武之衣冠若雲心安幪被遂以疾予告
栖遲逾年意泊如也府君篤資事之分割晨昏之戀
強公起補椽武庫遷佐職方蓄學與五兵偕富宏識

則九域同朗尋正車駕銳精置郵民鮮告痛國減冗
 耗遇恩實授進封府君如其官母鄒為宜人斯皇朱
 紱宗黨榮之會 天子方飾金華而治經術開白虎
 而講同異首以舊學兼采時獎改翰林修撰拜命之
 日俾仍五品祿章奏最之辰通理三考遷次銀緋綰
 曳之美徊徨弗居博望清華之選逡巡若畏詔美攜
 謙特聽所守尋與校 累朝寶訓實錄 宸章之炳
 煇若燭何假青藜天祿之恬淡如飴無謝玄白以錄
 成進侍讀同考會試 皇太子立 詔諭朝鮮賜公
 一品服充使者以往父老雜進方欽長卿之見難豪

帥歸誠自繇然明之却賄鼻水傳為盛事馬韓載在
 稗史公既嫺婉其度加以長慮淡識故太傅李文康
 公任在首揆號為知人適有密勿之陳薦公堪寄端
 右會 詔青宮已齒三至宜備四友公首擢司經局
 洗馬臺臣謂公酣酌不當儲輔 天子外伸諍路特
 寢新除仍顧輔臣出李啓事曰是尚堪朕輔者胡以
 不當儲耶且以酣酌加華某何異謂黃門為宣淫坐
 闈伯以闌入也公既却軌無通李復削草不泄時始
 兩賢之蛾眉見嫉班姬所以奉帚尊鱸非美季鷹托
 而扁舟予告歸里至是者再昔安石偃蹇朝命棲遲

東山自謂去巢許非遠公築園傍舍名曰嘉遯亦何以異茲而復見迫府君黽勉北上非其志也俄補故官命主南畿鄉試貝玉走不蹉之集桃李成無言之蹊前後二試若少宰茅公宗伯瞿文懿公兩魁天下尚書翁公陳公殷公侍郎兩朱公畢公曹公凌公輩出入三事蔚然名臣垂白羔鴈不廢師禮公程式之作世所指南片辭而模楷攸寓百試而光景恒新未幾超拜侍讀學士握留篆而南素薄宦情更涼物態冥鴻超蹈之旨默授流言青蠅點汙之談翻成知已乃以微謫露章乞骸駕言倦游篤懷養志 王

上愍其情不之強也公以學士侍二親且五十矣夔夔齋慄不改孺子之慕蒸蒸克諧遂成太和之風俄而奉政府君捐館匪法太連之善居有踰濬冲之歿孝溢米時進親慈爲之祝噎鷄骨支牀門故虞其毀性亾何又丁鄒宜人艱哀以歲加禮無老廢乃大營冢域茂樹楸檟鍾侯之墓田丙舍原氏之南陽新阡方斯茂矣公謂龍蛇屈伸士之恒遇杜樹之蔭百尺黃河之潤九里故計倪五策匪徒謀伯王丹千金聊以足志四姓之炊煙待暖羣稚之孤乳托儔取若困廩寄之衽席役助資匱之畝里搜伏匿之田涸轍多

潤乎蹄涔爲漁豈安乎竭澤至于取予歸節豐約因
心雖連雲之暈革爭騫而二簋之豚肩不掩物情頗
異行之自如若乃樹梓種漆樊君雲之迂筴也木屑
竹頭陶士行之瑣算也唯公行之獨得其效公雖家
埒素封服陽陵君之善對名在丹辰安張長公之退
節時有佞相假賜環而爲釣復邁倖帥指推轂以求
脂甘語狎至危機隱括有爲公動者公如不聞間謂
所親曰昔人有投鹽於水以明非惜惜所與也吾守
先人饘粥之遺而捐以填狹邪之徑乎且使白首婺
婦丹唇銜門匪惟失節徒增其醜俄而佞相倖帥相

繼淪敗始服公之遠識公林居凡三十載矯履迅步
若士之狎雲霄柔肌粲顏姑射之凌冰雪高標鮮令
簡度清貴室絕二八之勝坐無九九之客懸榻稀下
應門鮮通然而五祠並建躬辟王之蒸嘗千里裹糧
手故人之訛訊親仁汎愛道不相謀酬恩狗知誼有
攸當至于齊相脫駮未收越石之感孝標著論不免
到漑之嫌情意所安毀譽爲汰公旣杜口朝事遠跡
世途取亢寂寞之鄉長王嶠嶢之色偶周行墓所顧
盼松栢泫然久之謂諸子曰昔與陸生周旋館閣各
言爾志陸生慷慨裹革吾欲雍容經濟今皆已矣九

原有知寧無小憾君子以是知公之未盡忘世也公
素強無疾歲昭陽之作噩幸涂之月覺筋骨少異意
殊忽忽叔子方侍容臺典屬國促令請告奔波以歸
見之喜動顏色沈痾少平迄於改鑛竟不時損飾巾
待期綽乎太丘之度易簣就正儼矣子輿之啓大怖
將臨熙怡若寐小歛旣畢容色欣然公以弘治丁巳
季夏之六日生卒以萬曆之甲戌仲夏二十七日春
秋七十有八所著有碧山堂知退軒翰苑畱院東行
紀興巖居諸稿及纂華氏家乘九卷續傳芳集六卷
東壁蘭臺之撰春容雅麗爲宗一壑三徑之辭簡遠

玄澹爲主雖黼市人倫膾炙羣吻俱擅珪璋靡慚竹
素而巖居一集迥乎超矣公天與檢鏡夙成規穀右
文之景雖未竟其虹攄于陸之儀僅微徵於鴻漸使
際虞代則巢臯分德其在孔門亦憲賜裁衷矣寢疚
之際三子七孫長者垂紳服衿以侍湯藥少者累棊
採蠟以娛游目謝庭蘭玉之榮吾宗琳琅之秀人理
靡虧夫子可瞑甫及授窆叔子繼之乃知水竭鵬海
珊瑚隨而告枯鳳歸吊鳥鷓鷃以之從逝修短迥絕
衰榮不恒其門人王世貞等感匠石之見採悲融帳
之莫從恩澤未零音徽就杳進不能請字袞於公朝

退不獲寓心喪於私壠敢造菲頌寄之堅珉其爵里
父母子姓詳具於左銘曰

矯矯先生履坦安貞進不離體退不近名雙史東觀
授書西清譏以譽伏榮將瘁并三事步武一書投削
蓬心廟廊華邸丘壑天與真貴人豈縻爵畢力溫清
戢躬湯藥以儉成饒以饒成德用必取贏施必歸澤
內衆千指覲焉若畫環公之鄉爰諮爰式里有仁父
家有嚴君是亦爲政奚其離羣我徵在昔身隱焉文
君子修之必達必聞材足奢取事誠盈忌不朽讓一
達尊居二隱几委形超然曷累追契千古聲施

來終祀

